

宋

史

八十

列傳卷第二十九

宋史二百七十

開府儀同三司上柱國兼國軍事前書省丞相樞密院副都承旨領經筵事都總長脫等奉

勅

顏衍

劇可久

趙逢

蘇曉

高防

馮瓚

邊珣

王明

許仲宣

楊克讓

段思恭

侯陟

李符

魏丕

董樞

顏衍字祖德兗州曲阜人自言兗國公四十五世孫

少苦學治左氏春秋梁龍德中擢第解褐授北海主

簿以治行聞再調臨濟令臨濟多淫祠有針姑廟者

里人奉之尤篤術至即焚其廟後唐天成中為鄒平令符習初鎮天平習武臣之廉慎者以書告屬邑毋聚斂為獻賀術未領書以故規行之尋為吏所訟習遽召術答之幕客軍吏咸以為辱及正人習甚悔焉即表為觀察推官且塞前事長興初召拜太常博士習力奏留之習致仕術東歸養親未幾房知溫鎮青州復辟置幕下知溫險愎厚斂多不法術每極言之不避其患晉祖入洛知溫恃兵力偃蹇術勸其入貢知溫以善終術之力也知溫諸子不慧術勸令以家財十萬餘上進晉祖嘉之歸功於術知溫子彥儒授

沂州刺史衍拜殿中侍御史俄遷都官員外郎充東  
都留守判官改河陽三城節度副使檢校左庶子知  
州事居半歲得家問父在青州有風痺疾衍不奏棄  
官去侍疾不復有仕宦意歲餘父疾不能起衍親自  
搦矢未嘗少倦晉祖聞之召為工部郎中樞密直學  
士連使促召至闕辭曰臣無他才術未知何人誤有  
聞達望放臣還遂其私養晉祖曰朕自知卿非他人  
薦也俄廢樞密院以本官奉朝請踰年上表請還侍  
養授青州行營司馬丁父憂哀毀甚俄召為駕部郎  
中鹽鐵判官以母老懇辭有詔止守本官未幾復出

為天平軍節度副使開運末授左諫議大夫權判河南府召拜御史中丞喪亂之後朝綱不振衍執憲頗有風采嘗上言纔除御史者旋授外藩賓佐復有以私故細事求假外拜州郡無參謁之儀出入失風憲之體漸恐四方得以輕易百辟無所準繩請自今藩鎮幕僚勿得任臺官雖親王宰相出鎮亦不得奏充賓佐非奉制勘事勿得出京自餘不令釐雜務詔惟辟召入幕如故餘從其請復抗表求侍養改戶部侍郎衍又堅乞罷免詔書褒許即與其母東歸漢乾祐末丁憂服除詔鄆州高行周津遣赴闕衍辭以足疾

不至周廣順初起為尚書右丞俄充端明殿學士太祖征兗州駐城下遣衍徃曲阜祠文宣王廟城平以衍權知州事歸朝權知開封時王峻持權衍與陳觀俱為峻所引用會峻敗觀左遷衍罷職守兵部侍郎顯德初上表求解官授工部尚書致仕還鄉里臺閣縉紳祖餞都門外冠蓋相望時人榮之建隆三年春卒于家年七十四衍守章句無文藻然諒直孝悌為時所推

劇可久字尚賢涿州范陽人沈毅方正明律令與馮道趙鳳為友後唐同光初鳳薦於朝補徐州司法以

幹職聞召為大理評事賜緋踰年遷大理正坐誤治  
獄責授登州司戶遇赦召為著作郎仕晉歷殿中少  
監太子右諭德大理少卿賜金紫晉祖崩可久方在  
病告有司糾以不赴國哀坐免未幾復官遷大理卿  
周廣順初改太僕卿復為大理卿會鄭州民李思美  
妻詣御史臺訴夫私鬻鹽罪不至死判官楊瑛實以  
大辟有司攝治瑛瑛具伏可久斷瑛失入減三等徒  
二年半宰相王峻欲殺瑛召可久謂之曰死者不可  
復生瑛枉殺人其可恕耶可久執議益堅瑛得免死  
由是忤峻改太僕卿分司西京顯德三年所舉官犯

賊可久坐停任明年復起為右庶子世宗以刑書深古條目繁細難於揅討又前後敕格重互亦難詳審於是中書門下奏曰伏以刑法者御人之銜勒救弊之斧斤有國家者不可一日而廢也雖堯舜之世亦不能捨此而致治今奉制旨刪定律令有以見明罰敕法之意也竊以朝廷之所用者律十二卷律疏三十卷式二十卷令三十卷開成格一十卷大中統類一十二卷後唐以來至漢末編敕三十三卷及國朝制敕等律令則文辭古質或難以詳明格敕則條目繁多或有所疑誤將救舞文之弊宜伸畫一之規所

冀民不陷刑吏有所守臣等商議望準制旨施行仍命侍御史知雜事張湜太子右庶子劇可久殿中侍御史率汀職方郎中鄧守中倉部郎中王瑩司封員外郎賈玘太常博士趙礪國子博士李光贊大理正蘇曉太子中允王伸等十人編集新格勒成部秩律令之有難解者就文訓釋格敕之有繁雜者隨事刪削其有矛盾相違輕重失宜者盡從改正無或拘牽候畢日委御史臺尚書省四品以上及兩省五品以上官參詳可否送中書門下議定從之自是湜等於都省集議刪定仍令大官供膳五年書成凡三十卷

目曰刑統宰相請頒天下與律疏令式並行可久復拜大理卿建隆三年告老改光祿卿致仕卒年七十

七可久在廷尉四十年用法平允以仁恕稱

趙逢字常夫媯州懷戎人性剛直有吏幹父崇事劉守光為牙校後唐天祐中莊宗遣周德威平幽州因誅崇逢尚幼德威錄為部曲令與諸子同就學及德威戰沒胡柳陂逢乃游學河朔間久之西遊客鳳翔李從曦門下從曦卒侯益領節制逢又依之漢乾祐中益入為開封尹表逢為巡官逢不樂乃求舉進士是歲禮部侍郎集賢殿學士司徒翊典貢舉擢登甲

科解褐授祕書郎直史館周廣順中歷左拾遺右補  
 闕皆兼史職世宗嗣位遷禮部員外郎史館脩撰顯  
 德四年改膳部員外郎知制誥逾年轉水部郎中仍  
 掌誥命恭帝即位賜金紫宋初拜中書舍人太祖征  
 澤潞逢從行次河內聞李筠擁兵入寇又慮太行艱  
 險乃妄言墜馬傷足留於懷州駕還京有密旨除拜  
 逢當草制又稱疾不入太祖謂宰相曰此人得非規  
 避行役者耶對曰誠如聖言遂貶房州司戶會恩量  
 移汝州司馬乾德初召赴闕授都官郎中知制誥充  
 史館脩撰判館事二年改判昭文館未幾充樞密直

學士加左諫議大夫蜀平出知閬州時部內盜賊攻  
州城逢防禦有功賊既平誅滅者僅千家妻朱氏病  
死京師詔給葬事代還遷給事中充職六年權知貢  
舉太祖征太原以逢為隨軍轉運使鑄印賜之會發  
諸道丁壯數十萬築堤壅汾水灌晉陽城逢白太祖  
乞效用即命督其版築時方盛暑逢於烈日中親課  
力役因而遘疾輿歸京師開寶八年卒逢揚歷清近  
所至有聲然傷慘酷又言多詆訐故縉紳目之為鐵  
檠大中祥符三年特詔錄其子極為參班借職

蘇曉字表東京兆武功人父瓚仕後唐歷祕書少監

長興初曉辟鄧州從事漢祖鎮太原表為觀察支使  
周廣順初由華州支使入為大理正以讞獄有功遷  
少卿顯德中歷屯田郎中宋初詔與竇儀奚嶼張希  
讓等同詳定刑統為三十卷及編敕四卷建隆四年  
權大理少卿事遷度支郎中乾德三年出為淮南轉  
運使建議權斡黃舒廬壽五州茶置十四場規其利  
歲入百餘萬緡開寶三年遷司勳郎中改西川轉運  
使仍掌京城市征先是朝廷遣供備庫使李守信市  
木秦隴間守信盜官錢鉅萬既受代為部下所發守  
信至中牟自剄於傳舍太祖命曉案之逮捕甚衆右

拾遺通判秦州馬適妻李即守信息女守信嘗用木  
為筏以遺適曉得守信所送書以進太祖將捨之曉  
上章固請寘於法仍籍其家餘所連及者多至破產  
盡得所隱沒官錢擢拜曉右諫議大夫判大理寺賜  
金紫遷左諫議大夫七年監在京商稅九年六月卒  
年七十三曉深文少恩當時號為酷吏及卒無子有  
一女甚鍾愛亦先曉卒人以為深刻所致

高防字脩已并州壽陽人性沉厚守禮法累世將家  
父從慶戍天井關與梁軍戰死防年十六護柩以歸  
事母孝好學善為詩初張從恩為北京副留守奏攝

太原府倉曹掾從恩移澶州防禦使表為判官有親  
校段洪進盜官木造噐市取其直從恩聞之怒將殺  
之洪進懼恩緩其罪給曰判官使為之從恩召防詰  
之防即引伏洪進得免從恩遺防錢十千馬一疋遣  
之防拜受而去終不自明既而悔之命騎追及防不  
得已而還賓主如初又居帳下歲餘稍稍有言防自  
誣以活人從恩益加禮重從恩入為樞密副使防授  
國子監丞從恩留守西洛又為推官召拜殿中丞充  
鹽鐵推官以母憂去官服除隨從恩歷鄆晉潞三鎮  
判官契丹入汴晉主北行從恩欲歸款契丹召拜計

議防為陳逆順請固守臣節為左右所挫從恩不用  
其言遂歸契丹既行命副使趙行遷知留後從恩所  
親王守恩為巡檢與防同領郡事防與守恩謀誅行  
遷以城歸漢祖漢祖召防赴太原加檢校金部郎中  
乾祐初授屯田員外郎改浚儀令時楊邠用事與防  
有隙未幾免職居數月夢一吏以白帕裹印自門入  
授防防寤而思曰白主刑吾當為主刑官乎俄而周  
祖即位起為刑部員外郎更齎印至一如夢中所覩  
改開封令遷本府少尹除刑部郎中宿州民以刃殺  
妻妻族受賂偽言風狂病瘖吏引律不加考掠具獄

上請覆防云其人風不能言無醫驗狀以何為證且禁繫踰旬亦當須索飲食願再劾必得其情周祖然之卒寘於法世宗尹京判官崔頌忤旨簡求僚佐宰相首以防薦周祖曰朕方欲用之乃以防代頌世宗即位拜左諫議大夫賜金紫鞍勒馬顯德二年遷給事中從征淮南初下秦州即命防權知州事兼判海陵監事會吳師至迺遷州民入牙城分兵固守以俟外援俄而揚帥韓令坤馳騎召防吳軍復至廣陵防與令坤敗之詔書嘉獎三年改左散騎常侍其秋召歸闕復歷知蔡宋二州再從世宗南征判行泗州及

城降命防知州事復知蔡州五年遷戶部侍郎世宗  
謀取蜀以防為西南面水陸轉運制置使屢發芻糧  
赴鳳州為征討之備太祖還自陳橋防所居為里民  
所略詔賜綾絹衣服衾裯鞍馬及征李筠防又為潞  
州東北路計度轉運使澤潞平拜尚書左丞賜銀器  
綵帛鞍勒馬建隆二年出知秦州州與夏人雜處罔  
知教養防齊之以刑舊俗稍革州西北夕陽鎮連山  
谷多大木夏人利之防議建採造務闢地數百里築  
堡要地自渭而北夏人有之自渭而南秦州有之募  
卒三百歲獲木萬章夏部尚波千等率諸族千餘人

涉渭奪木筏殺役兵防出與戰俘四十七人以獻太祖慮擾邊郡詔諭酋帥賜所獲之俘錦袍銀帶以遣之遂罷採木之役命吳廷祚為節度以代防歸為樞密直學士復出知鳳翔乾德元年卒年五十九太祖甚悼惜賜其子太府寺丞延緒詔曰爾父有幹蠱之才懷匪躬之節朕所毗倚遽茲淪亡聞之盡傷不能自已矧素尚清白諒無餘資殯殮所須特宜優恤今遣供奉官陳彥珣部署歸葬西洛凡所費用並從官給

馮瓚字禮臣齊州歷城人性便佞任數務巧進父知

兆後唐司農卿瓚以蔭補解褐授秘書省校書郎遷  
著作佐郎出為諸城令歲滿授太子右贊善大夫漢  
初改監察御史周廣順元年遷殿中侍御史河陽判  
官宋仁範與洛陽婺婦交訟詔瓚劾之獄成大理斷  
以官當徒追兩官告身刑部員外郎張處素覆核無  
異奏行仁範詣闕訴其事詔還一官瓚洎處素俱坐  
降一階顯德初遷刑部員外郎充三司判官歲餘改  
祠部郎中充集賢院直學士宋初轉兵部郎中加金  
紫階瓚風神俊爽善談論有吏材太祖甚寵之擢拜  
左諫議大夫出知舒州境內有菰蒲魚鱉之饒居民

採以自給防禦使司超盡征之瓚奏奪民利請蠲除  
從之建隆四年春徙知廬州乾德三年以本官充樞  
密直學士時劔外初平卒有亡命者散匿為盜命瓚  
知梓州無何蜀軍校上官進率亡命三千餘人掠民  
數萬夜攻州城瓚曰賊乘夜奄至此烏合之衆以蕃  
挺相擊必無固志正可持重以鎮之旦自潰矣城中  
止有雲騎兵三百令分守城門瓚坐城樓密令促其  
更籌未夜分擊五鼓賊悉遁去因縱兵追之擒上官  
進斬於市誘其餘黨千餘人並釋其罪境內獲安初  
太祖欲任用瓚常與趙普言瓚有奇材普忌之乃遣

詣蜀平寇潛令所親信從其行密察其過即亡入京  
師擊登聞鼓訟瓚及監軍綾錦副使李美通判殿中  
侍御史李檝受賂為姦事急召歸闕親問之詞理屢  
屈乃屬吏既而普遣人至潼關閱其囊裝得金帶玦  
玩之物皆封題將以賂劉盎盎方在太宗幕府瓚具  
伏普言法當死太祖欲貸之普固執不可乃削去名  
籍瓚流登州沙門島美配隸通州海門島盎免所居  
官李檝者嘗與王德裔佐王饒幕太祖納孝明皇后  
因識之德裔輕率而檝謹厚太祖薄德裔而厚檝至  
是檝特免配流未幾復為御史瓚在海上凡十年不

得召開寶末遇赦放還太宗即位授左贊善大夫太平興國元年冬與禮部員外郎賈黃中左補闕程能分掌左藏三庫先是貨泉與金帛通至是以帑藏充溢乃命分之二年復賜金紫明年判大理寺改度支判官遷秘書少監充職四年上親征太原以瓚為隨駕三司判官凱旋攻大理卿兼判秘書省以足疾求解優詔免朝請令於本司視事瓚抗章請退除給事中致仕復舊勳階五年卒年六十七子克忠至內殿崇班閣門祇候

邊珣字待價華州鄭人也曾祖頡石泉令祖操下邳

令父蔚太常卿珣晉天福六年舉進士解褐祕書省  
校書郎直洪文館漢乾祐初為右拾遺加朝散大夫  
澤州饑奉詔視民田周廣順元年遷右補闕三年轉  
起居舍人顯德二年改庫部員外郎丁外艱服闋授  
職方員外郎知通州珣課鬻鹽於狼山歲增萬餘石  
宋初詣衛州視秋稼及掌京倉建隆二年兄玠自河  
南令入為吏部員外郎復以珣為洛陽令兄弟迭尹  
赤邑時人榮之乾德初召為倉部郎中蜀平命珣知  
三泉縣開寶初遷職方郎中監京兆麴務又掌永安  
軍權貨奏徙務揚州有富民訴廣陵尉謝圖殺其父

本部收尉囚之官吏推劾累三百日獄未具州以狀聞詔珣案鞫盡得其實乃富民以私憾誣告尉即反坐之就命權知州事仍兼權貨務罷郡又兼掌酒稅鹽礬務未幾丁母憂起復知州事會征江表兼領淮南轉運使金陵平知江北諸州轉運事太宗即位遷吏部郎中召還賜金紫充廣南轉運使初至桂州守張頌卒頌濰州人藁葬城外舊制不許以族行僕人乃分匿其家財珣召官吏悉追取之部送其柩歸濰州又屬郡守與護軍有忿隙者但奏令易地不致之於罪釁太平興國五年代歸拜右諫議大夫領吏部

選事七年移知開封府明年夏卒年六十三珣精力  
有吏材帝方欲倚用及聞其卒歎惜數四賻其家絹  
四百匹錢二十萬珣一子早卒以其從子俊為尉氏  
主簿兄玕至金部郎中弟玢右贊善大夫從子倣至  
殿中丞倚為比部員外郎

王明字如誨大名成安人晉天福中舉進士不第驍  
騎將藥元福為原州刺史辟為從事馮暉節制靈武  
表為觀察巡官周廣順初元福領陳州防禦使奏署  
判官會劉崇寇晉州命元福將兵援之事多浴於明  
先是州縣吏部送丁壯餉糧一夕夫盡遁去元福怒

盡驅官吏出軍門將就戮明馳往止之入白元福曰  
今軍儲無闕丁夫數萬人文吏懦不能制斬之何益  
不如寬以待之賊敗凱旋公無專殺之名不亦善乎  
元福感悟盡免其死既而崇衆宵遁即命元福為建  
雄軍節度留鎮因奏署明為書記賜緋魚顯德初元  
福移鎮陝恃功多驕恣明以直道規之忤其左右多  
毀明於元福元福亦稍踈之明以父病求歸省元福  
數召明明因謝絕之詣闕上書求任州縣歷清平鄜  
城二縣令宋初荆南高繼冲入覲授彭門節鉞以明  
為武寧軍節度掌書記乾德初召公卿近臣各舉清

白有吏幹者一人給事中馬士元以明塞詔召為左  
拾遺蜀平選知榮州代歸遷右補闕會用兵於嶺南  
選為荆湖轉運使開寶三年大舉南征以明為隨軍  
轉運使山路險絕舟車不通但以丁壯數萬人轉運  
供億不闕每下一郡一城必先保其簿書守其倉庫  
既而賀州未下明入與主帥計曰當急取之恐援兵  
至則我師勝負未可知諸將頗猶豫明乃擐甲胄率  
所部護送輜重卒百人擁丁夫數千畚鍤皆作堙其  
塹直抵城門城中懼開門納欵遂據有之因抵廣州  
賊衆十餘萬拒戰是夕大風發屋折木衆乃驚懼明

與都部署潘美等謀命丁夫數千人持二炬間道先搗賊壘大軍蓐食陣以待之俄而萬炬皆發焚其柵賊驚果來犯大軍因逆擊之賊大敗斬首數萬劉錡以城降廣州平為本道轉運使太祖嘉其功擢授祕書少監領韶州刺史充轉運使俄以潘美尹崇珂為嶺南轉運使以明為副使明徧歷部內視民疾苦舊無名科歛悉條奏除之嶺表遂安七年代歸帝召見勞問賜襲衣金帶鞍勒馬是歲將用師南唐以明為黃州刺史帝密授成筭明既視事即完葺城壘訓練士卒衆莫解其意俄而王師自荆渚乘戰艦而下

即以明為池州至岳州江路巡檢戰權都部署擊鄂  
州軍於江南斬首三百級又破萬餘人於武昌殺江  
南軍七百人拔樊山砦破江州軍斬首三千級又破  
江南軍三百人於江中獲船十餘艘又擊敗湖口軍  
萬餘衆奪戰艦五百艘時南唐將朱令贇自上江領  
衆十五萬連大艦沿流而下將焚采石浮梁抵金陵  
為援明率所部舟師屯獨樹口遣其子馳奏請添造  
戰艦三百艘以襲令贇帝曰非應急策也令贇朝夕  
至金陵之圍解矣乃密遣人諭明令樹長木於洲浦  
間若帆檣之狀令贇望見之果疑大軍襲其後逗撓

不敢進明移檄諸軍相為掎角因督兵權襲之至小孤山與諸軍合勢大破之擒令贄衆赴水死者十五六金陵平詔明安撫諸郡因命知洪州太宗即位兼領江南諸路轉運使召為右諫議大夫充三司副使太平興國七年與侯陟同判三司事八年召分三司各命使領之改左諫議大夫為鹽鐵使遷給事中雍熙四年改光州刺史出知并州端拱元年代還表求換秩改禮部侍郎會契丹擾邊詔以明知真定府契丹遁去淳化初詔歸闕知京朝官差遣事二年卒年七十三子挺扶並進士及第歷臺省累為轉運使皆

知名挺至殿中侍御史扶嘗直集賢院至工部員外郎景德中錄幼子揆為光祿寺主簿大中祥符八年又錄其孫師顏為三班借職揆至殿中丞

許仲宣字希粲青州人漢乾祐中登進士第時年十八周顯德初解褐授濟陰主簿考功員外郎張乂薦為淄州團練判官宋初赴調引對便殿仲宣氣貌雄偉太祖悅之擢授太子中允受詔知北海軍仲宣度其山川形勢地理廣袤可以為州郡因畫圖上之遂升為濰州初議建牧馬監令仲宣行視諸州頗得善地從征并門掌給納四十餘州資糧悉能集事帝益

知其彊幹開寶四年知荆南轉運事及征江南又兼南面隨軍轉運事兵數十萬供饋無闕南唐平以漕輓功拜刑部郎中中謝日召升殿獎諭賜緋九年詔知永興軍府事太宗嗣位遷兵部郎中驛召赴闕賜金紫授西川轉運使屬西南夷寇鈔邊境仲宣親至大度河諭以逆順示以威福夷人率服會言事者云江表用兵時仲宣乾沒官錢召還令御史臺盡索財計簿鈎校凡數年而畢無有欺隱改廣南轉運使會征交州其地炎瘴士卒死者十二三大將孫全興等失律仲宣因奏罷其兵不待報即以兵分屯諸州開

庫賞賜草檄書以諭交州交州即送欸內附遣使修  
貢仲宣復上章待罪帝嘉之太平興國六年冬南郊  
畢遷吏部郎中八年與膳部郎中知雜滕中正兵部  
郎中劉保勲刑部郎中辛仲甫皆以久次郎署擢陞  
諫垣仲宣為左諫議大夫未幾召還以本官權度支  
雍熙四年出知廣州未上移知江陵府俄改河南府  
端拱中遷給事中淳化元年卒年六十一仲宣性寬  
恕侷儻不檢有心計初為濟陰主簿時令與簿分掌  
縣印令畜嬖妾與其室爭寵令弗能禁嬖欲陷其主  
竊取其印藏之封識如故以授仲宣翌日署事發匣

則無其印因逮捕縣吏數輩及令簿家人下獄鞫問果得之於令舍竈突中令聞之倉皇失措仲宣處之晏然人服其量嘗從征江南都部署曹彬令取陶器數萬給士卒為燈具仲宣已預料置奉之如其數其才幹類此子待用至國子博士待問再舉及第至殿中丞待旦至此部員外郎待用子巨源亦登進士第楊克讓字慶孫同州馮翊人高祖公略洪州都督晉末舉進士不第州將劉繼勳辟為戶曹掾漢乾祐中本府節度張彥成表授掌書記周廣順初彥成移鎮安陽穰下克讓以舊職從行彥成入為執金吾病篤

奏稱其材可用克讓以彥成死未葬不忍就祿退居別墅俟張氏子外除時論稱之歷鎮寧軍掌書記顯德二年調授鳳翔府司錄參軍加兼監察御史以祖母老解官歸養未幾改延州觀察推官與通判宋琪並為節度使趙贊所禮累加朝散大夫兼殿中侍御史連以家難去職太祖素知其名會贊入覲復稱其才即起為左補闕掌斬口榷貨務乾德六年知果州上言願畢襄事特賜緡錢許葬畢赴任開寶三年就命為西川轉運副使蜀民懷其善政璽書褒美代歸闕下䟽民利病十事稱旨太祖召升殿賜坐勞問面

賜金紫將大用為侯陟所沮事見陟傳征南唐命克讓知昇州行府昇州平就知州事兼水陸計度轉運使事加兵部員外郎太平興國初就加刑部郎中知大名府會錢俶陳洪進來歸疆土以克讓為兩浙西南路轉運使泉州民嘯聚為盜克讓在福州即率其屯兵至泉州與王明王文寶共討平之四年徙知廣州俄兼轉運使明年卒年六十九克讓少好學手寫經籍盈於篋笥多收圖畫墨跡歷官廉謹幹局所至有聲每視事自旦至暮或通夕斷決如流無有凝滯當時稱為能吏子希閔字無間生而失明令諸

弟讀經史一歷耳輒不能忘屬文善緘尺趙普守西  
洛府中牋疏皆希閔所為將奏署本府掾固辭不受  
普優加給贍張齊賢李沆薛惟吉張茂宗繼領府事  
皆優待之卒年三十九有集二十卷自教三子日華  
日嚴日休皆登進士第日華都官員外郎日嚴職方  
員外郎日休殿中丞希閔弟希甫淳化三年進士至  
屯田員外郎從子日宣亦登進士第  
段思恭澤州晉城人曾祖約定州司戶祖昶神山令  
父希堯晉祖鎮太原辟為從事與桑維翰同幕府晉  
有天下希堯累歷清顯思恭以門蔭奏署鎮國軍節

度使官天福中希堯任棣州刺史兼權鹽磬制置使  
思恭解官侍養奉章入貢改國子四門博士賜緋開  
運初出為華商等州觀察支使劉繼勳節制同州辟  
為掌書記繼勳入朝會契丹入汴軍士誼譟請立思  
恭為州帥思恭諭以禍福拒而弗從乃止漢祖建國  
授左補闕隱帝時蝗詔徧祈山川思恭上言赦過宥  
罪議獄緩刑苟獄訟平允則災害不生望令諸州速  
決重刑無致淹濫必召和氣從之歷度支駕部周顯  
德中定濱州田賦世宗嘉之賜金紫丁外艱服闋拜  
左司員外郎建隆二年除開封令遷金部郎中乾德

初平蜀通判眉州時亡命集衆攻逼州城刺史趙廷  
進懼不能敵將奔嘉州思恭止之因率屯兵與賊戰  
彭山軍人皆觀望無鬪志思恭募軍士先登者厚賞  
於是諸軍賈勇大敗賊思恭矯詔以上供錢帛給之  
後度支請按其罪太祖憐其果幹不許令知州事丁  
母憂起復俄召為考功郎中知泗州會馮繼業自靈  
州舉宗來朝帝以思恭代知州事仍語之曰馮繼業  
言靈州非衛霍名將鎮撫之不可汝其往哉思恭曰  
臣奉詔而往必能治之帝壯之賜窄衣金帶錢二百  
萬仍以塗涉諸部令別齎金帛以遺之思恭下車矯

繼業之失綏撫夷落訪求民病悉條奏免之俄而回鶻入貢路出靈州交易於市思恭遣吏市硃砂吏爭直與之競思恭釋吏械其使數日貫之使還愬其主復遣使齎牒詣靈州問故思恭理屈不報自是數年回鶻不復朝貢久之遷右諫議大夫知揚州朝廷方經略江表命思恭兼沿江巡檢每出巡委州事於通判以牌印鼓角金鉦自隨驛書自京師來者令齎至其所事多稽滯因與通判李岩相告訐詔以屬吏思恭辭不直責授太常少卿改知宿州太宗即位遷將作監知秦州坐擅借官庫銀造器又妄以貢奉為名

賤市絨毛虎皮為馬飾為通判王廷範所發降授少  
府少監知邢州太平興國六年遷少府監雍熙元年  
南郊畢表乞復舊官再為右諫議大夫二年知壽州  
端拱初遷給事中尋知陝州淳化三年卒年七十三  
思恭以門資歷顯官不知書無學術然踐更吏事所  
至亦著勤績子惟一至太常博士三司度支判官從  
子惟幾第進士仕至兵部員外郎

侯陟淄州長山人漢末舉明經周廣順初試校書郎  
為西州回鶻國信使判官還補雷澤主簿司門員外  
郎姚恕凡四薦陟為襄城令汝州防禦判官濮陽襄

邑令建隆初為寃句令以清幹聞二年擢為左拾遺  
仍知縣事節度表彥頗為不法陟抗章言之彥上表  
謝自陳無罪太祖亦不窮治四年令兼領本縣屯兵  
俄改淮南轉運使賜緋衣黑銀帶遷右補闕乾德三  
年就改侍御史明年入為左司員外郎度支判官朝  
議欲以本官領省事改度支員外郎依前充判官開  
寶五年復為左司員外郎六年權判吏部銓俄賜金  
紫十二月詔與戶部員外郎知制誥王祐等同知貢  
舉未鎖宿出知揚州會出師收金陵陟以所部敗南  
唐軍千人於宣化城俄為部下所訟追赴闕陟度理

窮乃求哀盧多遜多遜素與陟善為其畫計時江表未拔太祖厭兵南土暑熾軍卒疫死方議休兵以為後圖陟適從揚州來知金陵危甚多遜令上急變求見陟時被病令掖入即大言曰南唐平在朝夕陛下奈何欲班師願急取之臣若誤陛下願夷三族上屏左右召升殿問狀遂寢前議並赦陟罪復知吏部選事太平興國初遷戶部郎中俄而選人有妄冒事發詞涉於陟南曹雷德驤將奏劾之陟造便殿自首出為河北轉運使征太原為太原東路轉運使駕還次鎮州命先還上都供頓軍需以功遷左諫議大夫權

御史中丞事五年同知貢舉開寶末趙普在中書陟  
嘗上疏言其短至是普再入相陟頗憂恚六年南郊  
畢加給事中七年三司使王仁贍左降以陟與王明  
同判三司八年卒贈工部尚書陟有吏幹性狡獪好  
進善事權貴巧中傷人太祖嘗召刑部郎中楊克讓  
命坐與語且諭以將大用陟素忌克讓偵知之因奏  
事上問識楊克讓否陟曰臣與克讓甚善知其人才  
識朝廷佳士也近聞其自言上許以大用多市白金  
作飲器以自奉臣頗恠之上怒亟令克讓出典郡其  
險詖如此

李符字德昌大名內黃人漢乾祐中郭從義討趙思  
綰於京兆辟符在幕府表為京兆府戶曹掾歷郿縣  
主簿保義軍節度推官丁內艱服除調汝州防禦判  
官權知州事右庶子楊恪薦為大理正乾德中知歸  
州轉運司制置歸朝以京西諸州錢帛不登選知京  
西南面轉運事奏便宜百餘條凡四十八事命著為  
令賜緋魚因奏對稱旨遷起居郎後荆湖轉運許仲  
宣隨軍討南唐詔符赴荆湖調發芻糧符領船數千  
艘順流而下事畢賜金紫符又建議鑿橫江河以通  
漕運發和州三縣丁壯給其役太祖欲幸西京有事

于南郊符上書陳八難曰京邑凋弊一也宮闕不備  
二也郊廟未修三也百司不具四也畿內民困五也  
軍食不充六也壁壘未設七也千乘萬騎盛暑扈行  
八也不從禮畢還京改比部員外郎判刑部太平興  
國初遷駕部轉祠部郎中知廣州兼轉運使二年符  
圖海外諸城及嶺外花木各一以獻在任有善政民  
為立生祠五年召為右諫議大夫判吏部銓兼大理  
寺理三司副使范旻得罪以符代之賜白金三千兩  
車駕幸大名領行在三司未幾坐與官屬競課最罷  
職守本官七年春開封尹秦王廷美出守西京以符

知開封府廷美事發太宗令歸第省過趙普令符上  
言廷美在西洛非便恐有他變宜遷遠郡以絕人望  
遂有房陵之貶普恐泄言坐符用刑不當貶寧國軍  
行軍司馬盧多遜貶崖州也符白普曰珠崖雖遠在  
海中而水土頗善春州稍近瘴氣甚毒至者必死願  
徙多遜處之普不答先是太宗尹京符因宋琪薦彌  
德超事藩邸符貶德超為樞密副使屢稱其寃會德  
超以事貶帝惡其朋黨徙符嶺表普移符知春州至  
郡歲餘卒年五十九符無文學有吏幹好希人主意  
以求進用終以此敗至道二年郊祀追復右諫議大

夫祥符五年錄其子璜試將作監主簿

魏丕字齊物相州人頗涉學問周世宗鎮澶淵辟司  
法參軍有盜五人獄具丕疑其寃緩之不數日果獲  
真盜世宗嘉其明慎歷頓丘冠氏元城三縣令世宗  
即位改右班殿直自陳本以儒進願受本資官世宗  
曰方今天下未一用武之際藉卿幹事勿固辭也未  
幾出監明靈砦軍世宗征淮甸丕獲江南謀者四人  
部送行在詔獎之賜錢十萬遷供奉官供備庫副使  
太祖即位改作坊副使時楊承信帥河中或言其反  
側未安命丕賜承信生辰禮物陰察之還言其無狀

太祖嘗召對語丕曰作坊久積弊爾為我脩整之丕  
在職盡力以久次轉正使開寶九年領代州刺史凡  
典工作十餘年討澤潞維揚下荆廣收川峽征河東  
平江南太祖皆先期諭旨令修利器械無不精辦舊  
床子弩射止七百步令丕增造至千步及改繡衣鹵  
簿亦專敕丕裁製丕撤本坊舊屋為舍衢中收僦直  
及鬻死馬骨歲得錢七千餘緡工匠有喪者均給之  
太祖幸洛郊祀三司使王仁贍議雇民車牛運法物  
太祖以勞民不悅召丕議之丕請揀本坊匠少壯者  
二千餘分為遞鋪輸之時以為便雍熙四年代郝正

為戶部使端拱初遷度支使是冬出為黃州刺史還朝召對便坐賜御書急就章朱邸集丕退作歌以獻因自述願授臺省之職太宗面諭曰知卿本儒生然清望官奉給不若刺史之優也淳化初改汝州刺史歷知鳳州改襄州境內久旱丕以誠禱之二夕雨沾足明年召還屢求退居西洛不許四年表求致仕授左武衛大將軍仍領汝州刺史俄判金吾街仗初六街巡警皆用禁卒至是詔左右街各募卒千人優以廩給使傳呼備盜丕以新募卒引對遂分四營營設五都一如禁兵之制五年改領郢州刺史俄改領復

州遷左驍衛大將軍咸平二年卒年八十一丕好歌  
詩頗與士大夫遊接有時稱南唐主李煜妻卒遣丕  
充弔祭使且使觀其意趣煜邀丕登昇元閣賦詩丕  
有朝宗海浪拱星辰之句以風動之太宗嘗賜詩令  
丕與柴禹錫和焉

董樞直定元氏人後唐太清中以獻書授校書郎累  
歷賓佐晉天福中為左拾遺知樞密院表奏周廣順  
初為左補闕世宗即位詔常參官各奏封事樞上平  
吳策淮南平遷浚儀令恭帝即位遷殿中侍御史太  
祖乾德初遷主客員外郎上書請伐蜀蜀平通判劔

州會全師椎叛攻劔刺史張仁謙足疾不能戰欲棄城走樞固爭戰賊敗之因招餘衆降仁謙飲樞令醉密殺降數百誣奏樞與賊通會中使自成都還備言其事太祖並召之庭辯曲直仁謙遂屈下御史臺鞫之黜宋州教練使以樞嘗貢西伐計遷比部郎中三年出兼桂陽監使上書請伐廣南詔益桂陽戍卒三千令樞統之開寶二年又上方略會劉鋹令內侍曾居實侵桂陽樞擊退之三年大舉伐鋹令樞率兵趨連口克之改兵部郎中權知連州兼行營招撫使嶺南平賜錢三百萬四年竊知襄州又為河北轉運使

改判西京留司御史臺初樞罷桂陽監以左贊善大  
夫孔璘代之璘通三禮嘗講學於河朔擢第歷州縣  
及升朝蒞桂陽歲滿以太子洗馬趙瑜代之瑜趙州  
人家世豪右自言諳練邊事開寶中命為易州通判  
歲滿移桂陽瑜至即稱疾遂以著作郎張侃代之侃  
至月餘奏瑜在任累月得羨銀數十斤雖送官而不  
具數聞計樞與璘隱沒可知矣詔下御史案之獄具  
有司計盜賊法俱當死太祖曰趙瑜非自盜但不能  
發擿耳樞璘並坐死瑜決杖流海島擢侃為屯田員  
外郎

論曰顏衍振舉風憲不避彊禦劇可久居廷尉之任以平允聞趙逢果斷之士而獨尚嚴酷處之要密之職則非所宜蘇曉銳意深刻樂致人罪後嗣衰謝厥報不誣高防陳逆順以聳臣節體明慎而究疑獄治迹清操沒而彌章若其自誣以拯人之死古人何加焉馮瓚省關市之苛賦設方畧以擊賊功若可稱而巧宦任數竟致傾敗理固然矣邊瑊王明許仲宣揚克讓當官效用以清幹稱然仲宣寬簡持重造次不撓蓋人之難能者王明累參戎事預立戰功至若開諭元福止其暴誅此赴蹈之仁也段思恭遏亂兵擊

群寇便宜從事以著竒績斯亦可矣然不能動遵規  
矩速訟左降者再焉侯陟吏才適用患在伎刻李符  
博通時務乃事深文以致投荒自弊遂為口實魏丕  
久典工効以濟戎用至於平反寃盜之獄捄揚承信  
之誣善尤可稱董樞論平吳伐蜀及取廣南咸克舉  
之且多戰功而以貪墨取敗惜哉

列傳卷第二十九

且多... 墨... 烟... 婦... 婦... 婦...  
 之... 善... 亦... 何... 難... 能... 平... 吳... 為... 漢... 又... 項... 費... 南... 烟... 吳... 舉...  
 父... 典... 工... 以... 有... 用... 至... 於... 平... 又... 漢... 盜... 之... 稱... 耕... 農... 計...  
 刺... 直... 有... 者... 已... 車... 采... 文... 以... 短... 射... 流... 自... 轉... 動... 於... 口... 實... 贖... 王...  
 雖... 遠... 治... 法... 李... 皆... 再... 無... 美... 楚... 吏... 下... 而... 伊... 邊... 却... 却... 侯... 李... 計...  
 籍... 因... 更... 立... 其... 事... 以... 善... 治... 龍... 棋... 亦... 百... 矣... 然... 不... 拍... 位... 數... 賦...

列傳卷第三十

宋史二百七十一

開府儀同三司上柱國錄軍國軍事前書右丞相監修國史領經筵事都總裁<sub>臣</sub>脫等奉

勅修

馬令琮

杜漢徽

張廷翰

吳虔裕

蔡審廷

周廣

張勳

石曦

張藏英

陸萬友

解暉

李韜

王晉卿

郭廷

謂從子延濬  
子延澤

趙延進

輔超

馬令琮本名令威避周祖名改之大名人父全節五代史有傳全節歷橫海定遠昭義彰德定武天樞六

節度皆署令琮為牙校累授彰德牙內都指揮使檢校尚書左僕射領勤州刺史令琮少善騎射嘗從其父平安州及與鎮州安重榮戰皆有功由是知名晉開運二年全節卒令琮起復拜隰州刺史漢祖開國為西京巡檢使周祖受命改陳州刺史征兗州為京城門外巡檢世宗嗣位移隨州顯德二年入為虎捷左第一軍都指揮使六年兼領建州刺史太祖即位出刺懷州李筠叛將親征召三司張美餉兵食美言河內密邇上黨令琮日夜儲蓄以俟王師太祖善之命授團練使執政言令琮方供億大軍不可移他

郡故升懷州為團練以令琮充使又充先鋒都指揮使澤潞平為昭義兵馬鈐轄踰年被疾詔許歸郡乾德元年卒年三十九太祖甚憐之錄其子延恩為殿直

杜漢徽京兆長安人父阿孫為太原威勝軍使漢徽有膂力善騎射年十七仕後唐武皇為廳直隊長天成中累遷護聖軍使晉天福六年與慕容鄴等討安州李金全生禽指揮使孫厚以功遷興順指揮使八年從征鎮州安重榮改護聖指揮使贈阿孫為左贊善大夫開運二年以所部戍深州破契丹於樂壽殺

獲其衆漢初從高行周討杜重威於鄴屢為流矢所  
中身被重創猶力戰觀者壯之又率所部戍鎮州破  
契丹於靈壽獲車馬甚衆周世宗征劉崇漢徽有戰  
功補龍捷左第五軍都虞候移所部屯安平縣破契  
丹於縣南獲器甲車帳遷本軍左第四軍都虞候宋  
初補本軍都校領茂州刺史改領潮州從平李筠又  
從平李重進錄功居多建隆三年出為天長軍使移  
雄武軍使知屯田事是冬被病即以符印授通判宋  
鸞請告歸京家人勸其求醫藥漢徽笑曰我在戎行  
四十年大小百餘戰不死幸矣安用藥為未幾卒

張廷翰冀州信都人父慎圖仕周為兵部郎中廷翰少慷慨有智略善騎射晉天福中冀州刺史張建武召補牙校其後刺史李冲署為本州牢城軍校契丹入中原署其黨何行通為刺史契丹主道殂州人共殺行通推廷翰知州事漢初就拜刺史廷翰盡捕殺行通者戮於市為政寬厚簡易民甚愛之周廣順初召赴闕周祖見其貌魁偉謂樞密使王峻曰冀州近邊雖更擇人亦無踰廷翰者即日遣還在郡八年契丹將高牟翰數擾邊皆為廷翰擊走廷翰家富於財歲遣人齎金帛北入市善馬常得數百匹貢獻外悉

遺貴近甚獲美譽顯德中歷棣海沂三州團練使屢率兵敗淮人移萊州宋初又歷冀亳二州乾德二年卒年四十七

吳虔裕許州許田人父徽左屯衛將軍虔裕少為郡吏漢祖鎮許愛其精謹署以右職及移鎮太原以虔裕從開國擢為引進使轉內客省使時鎮州節度劉在明卒遣虔裕率兵巡護隱帝即位召為宣徽北院使周祖討三叛以虔裕為河中行營都監率護聖諸軍五千以往李守貞出兵五千餘設梯橋分五路於長連城西北以禦周祖周祖令虔裕率大軍橫擊之

蒲人敗走奪其梯橋殺傷大半師還賜襲衣玉帶會  
樞密使楊邠上言求解職隱帝遣人諭邠曰樞機之  
任非卿不可卿何聽間雜而為此請耶使至而虔裕  
在坐即颺言曰機要重地非可久虔俾後來者迭居  
可也使還以白帝帝怒出虔裕為鄭州防禦使乾祐  
末誅大臣急詔入朝命將兵守澶州及留子陂戰敗  
遂降周祖廣順初遣還賜以襲衣玉帶鞍勒馬從周  
祖討慕容彥超破之改汝州防禦使歷右衛左金吾  
衛二大將軍兼街仗使太平興國六年遷右千牛衛  
上將軍仍判左街仗事虔裕掌金吾三十餘年端拱

初卒年八十八贈太尉虔裕性簡率言多輕肆右金  
吾上將軍王彥超告老虔裕語人曰我縱僵仆殿階  
下斷不學王彥超七十致仕人傳笑之每朝會及從  
遊宴太宗憐其壽高常慰撫之子延彬至儀鸞副使  
延彬子仁美至內殿崇班

蔡審廷磁州武安人曾祖凝邢州別駕祖綰武安遠  
城三治使父顯洛州長史審廷少能騎射晉初應募  
補護聖散都頭周顯德初擢為殿前散員轉鐵騎副  
兵馬使從世宗戰高平有功遷軍使太祖為殿前都  
點檢從世宗征淮南審廷隸麾下預戰紫金山改副

指揮使宋初授殿前散都頭指揮使從征李筠攻澤州先登為飛石傷足帝賜以良藥美酒及車駕還京幸其官署問之賜賚甚厚尋轉內殿直都虞候俄改伴飯都指揮使建隆中領富州刺史兼內外馬步軍副都軍頭乾德初授冀州刺史征太原時為北面步軍都指揮使屯兵易州審廷訓練士卒甚整太祖過鎮陽見於行在所賜名馬寶劍命為鎮州兵馬都鈐轄開寶八年卒年六十九

周廣字大均其先應州神武川人父密事晉歷廊延晉三鎮節度使周廣順初至太子太師致仕廣幼從

其父為牙校漢初授供奉官未幾擢左千牛衛將軍周祖命將討慕容彥超於兗州以廣為行營都監賊平錄功遷右武衛將軍俄改右神武將軍充鎮淮軍兵馬都監從世宗征淮南既得江北數州即命廣勞來安集民其德之因領常州刺史兼內外馬步軍都軍頭淮南平改眉州刺史宋初授隰州刺史乾德三年遷潘州團練使令訓練雄武諸營開寶二年從征太原為攻城樓櫓戰櫂都部署師還加內外馬步軍副都軍頭六年改右屯衛大將軍領郡如故太平興國二年卒

張勳河南洛陽人晉開運中事留守景延廣為典客  
延廣表為供奉官周世宗將征淮南以勳為申州緣  
淮巡檢因採光州機事聞于朝廷即命勳率兵同討  
平之遂監光州軍充內外巡檢後攻黃州敗吳人於  
麻城復破栢業山砦目中流矢遷內園副使及征瀛  
莫以為霸州兵馬都監初征李筠勳從石守信董前  
軍拔大會砦及敗筠衆於太行破澤州皆預有功太  
祖還京命權知許州未幾李重進叛又詔與石守信  
李處耘先率兵進討拔揚州以勳為兵馬都監遷甌  
毳使討朗陵充前軍兵馬都監荆湖平以功就拜衛

州刺史乾德初克郴州及桂陽監以勲為刺史兼監使五年代歸至揚州卒年六十八太祖甚憐之錄其子廷敏為殿直勲性殘忍好殺每攻破城邑但揚言曰且斬頗有橫罹鋒刃者將赴衡州州民皆涕泣相謂曰張且斬至矣吾輩何以安乎

石曦并州太原人晉祖弟韓王暉之子天福中以曦為右神武將軍歷漢至周為右武衛左神武二將軍恭帝即位初為左衛將軍會高麗王昭加恩命曦副左驍衛大將軍戴交充使建隆三年再使高麗遷左驍衛大將軍護秦州屯兵西人犯邊曦率所領擊破

之斬渠帥十三人太祖征晉曦領兵二千人自澤潞  
除道至太原壅汾水灌其城又益兵千人部攻遼州  
俄知雄州代為潭州鈐轄開寶八年領兵敗南唐軍  
二千餘于袁州平梅山板倉諸洞蠻寇俘馘數千人  
太平興國中歷右神武右羽林大將軍連知孟襄二  
州遷領誠州刺史雍熙四年改知霸州兼部署會陳  
廷山謀以平戎軍叛入北邊曦察知之與侯延濟定  
計禽廷山以獻錄其功加領本州團練使同知鎮州  
淳化二年移原州遷右龍武軍大將軍被病請告詔  
特給全奉四年卒年七十四贈賻加等

張藏英涿州范陽人自言唐相嘉貞之後唐末舉族  
為賊孫居道所害藏英年十七僅以身免後逢居道  
於豳州市引佩刀刺之不死為吏所執節帥趙德鈞  
壯之釋而不問以補牙職藏英後聞居道避地關南  
乃求為關南都巡檢使至則微服携鐵櫪匿居道舍  
側伺其出擊之仆於地齧其耳噉之遂禽歸設父母  
位陳酒肴縛居道於前號泣鞭之鬻其肉經三日剗  
其心以祭即詣官首服官為上請而釋之燕薊間目  
為報讎張孝子契丹用為盧臺軍使兼權鹽制置使  
領坊州刺史周廣順三年率內外親屬并所部兵千

餘人及煮鹽戶長幼七千餘口牛馬萬計舟數百艘  
航海歸周至滄州刺史李暉以聞周祖頗疑之令館  
於封禪寺俄賜襲衣銀帶錢十萬絹百匹銀器鞍勒  
馬數月世宗即位授德州刺史未幾召歸對便殿詢  
以備邊之策藏英請於深州李晏口置砦及誘境上  
亡命者以隸軍願為主將得便宜討擊世宗悉從之  
以為緣邊招收都指揮使賜名馬金帶藏英遂築城  
李晏口累月募得勁兵數千人會遣鳳翔節度王彥  
超巡邊為契丹所圍藏英率新募兵馳往擊之轉戰  
十餘里契丹解去改濮州刺史仍領邊任契丹將高

牟翰以精騎數千擾邊藏英逆擊於胡盧河北自旦  
至晡殺傷甚衆值暮收兵契丹遁去後因領兵巡樂  
壽契丹幽州驍將姚內斌偵知藏英兵少以精騎二  
千陣於縣之北藏英率麾下擊之自辰及申士皆殊  
死戰內斌遂解去世宗降爾書褒美征瓦橋關為先  
鋒都指揮使敗契丹騎數百於關北下固安縣又改  
關南排陣使宋初遷瀛州團練使并護關南軍建隆  
三年卒於治所年六十九孫鑑自有傳

陸萬友蔚州靈丘人少隸太原為裨校漢祖起義擢  
為護聖指揮使隱帝即位出為天雄軍馬軍都指揮

使周祖之起兵也萬友預謀及踐阼擢為散員都指  
揮使領獎州刺史世宗嗣位遷龍捷左第三軍都指  
揮使轉控鶴右廂都校領虔州團練使改虎捷右廂  
領閩州防禦使恭帝嗣位出為安州防禦使宋初歷  
沂蘄二州防禦使乾德四年改汝州開寶中討南唐  
造舟于采石磯以濟師命萬友守之江南平為和州  
防禦使太宗嗣位以為晉絳等州都巡檢使帝征太  
原克汾石二州以萬友為石州都巡檢使俄兼知石  
州移巡警鳳翔秦隴代歸詔知瀛州在郡二年政務  
苟簡雍熙二年改右監門衛大將軍充河陰兵馬都

監逾年卒年七十三萬友始業巧鑊既貴達不忘本  
以銀為巧鑊器數十事示子孫性猛暴以武勇自任  
所至無善政太宗以其勲舊恩遇不替聘其次女為  
許王夫人

解暉洛州臨洛人父珪應募為州兵後唐天成中西  
征至劔門沒於陣暉少有勇力以父死戎事得隸兵  
籍戍鴈門與契丹接戰斬首七級獲酋長一人以功  
遷奉國軍隊長晉天福中安重榮反鎮州因舉兵向  
關至宋城晉師逆戰大破之暉募軍中壯士百餘人  
夜擣賊壘殺獲甚衆暉頻中流失而督戰自若顏色

不撓以功遷本軍列校周廣順初劉崇與契丹侵晉  
州暉從都部署樞密使王峻等往援之暉率敢死十  
三十餘夜入契丹帳擊之殺獲甚衆遷本軍第五指  
揮使從世宗征淮南率所部下黃州禽刺史高弼遷  
虎捷第一軍都虞候宋初步軍都軍頭從征澤州力  
戰目中流矢師還策勲為內外馬步軍副都軍頭建  
隆四年充湖廣道行營前軍戰權都指揮使潭州平  
降爾書獎諭偽統軍黃從志據岳州暉率舟師討平  
之生禽從志及將校十四人俘斬數千溺死者衆攻  
控鶴右第二軍都指揮使領高州刺史乾德六年詔

領所部軍屯上黨從李繼勳略太原開寶九年破太原軍於境上斬首千餘級獲馬三十四匹改均州刺史太平興國二年詔於潞州北亂柳石圍中築城名威勝軍以暉為軍使從征并州與尚食使石彥贇率所部先下隆州殺并州三百餘禽招討使李詢等六人以獻于行在所賜予有加復令與彥贇督戰士隸城西行營分攻太原劉繼元降太宗以太原宮女三人賜暉俄以功遷本州團練使知霸州雍熙初充雲應寰朔忻代等州都巡檢使三年代歸本郡淳化二年被病上章告老改右千牛衛上將軍致仕詔未至而

卒年八十暉鷙猛木強每受詔征伐常身先之人所  
憚者暉視之若甚易由是頻立戰功金創徧體時稱  
驍將子守顥至內殿崇班閤門祇候

李韜河朔人有勇力膽氣善用稍為禁軍隊長周祖  
征三叛韜從白文珂攻河中兵傳其城文珂夜詣周  
祖議犒軍留韜城下時營柵未備李守貞乘虛來襲  
營中忽見火發知賊驟至惶怖失據客省使閻晉卿  
率左右數十人遇韜於月城側謂韜曰事急矣城中  
人悉被黃紙甲為火光所照色俱白此殊易辨奈軍  
士無鬪志何韜憤怒曰豈有食君祿而不為國致死

三十九十三  
耶即援稍而進軍中死士十餘輩隨韜犯賊鋒蒲有  
猛將躍馬持戈擬韜韜刺之洞胷而墜又連殺數十  
人蒲軍遂潰因擊大破之守貞自是閉壘不敢出俄  
驍將王三鐵降城遂平韜由此知名累遷軍校出為  
趙州刺史移慈州乾德六年卒

王晉卿河朔人少勇敢為鄉里所推周世宗在澶淵  
晉卿以武藝求見得肆帳下及即位補東頭供奉官  
從戰高平征淮甸每遣宣傳密旨甚親信之洎北征  
為先鋒都監督戰有功詔權控鶴都虞候克關南授  
軍器庫使顯德四年為龍捷右第一軍都指揮使領

彭州刺史恭帝即位出為濱州刺史乾德中為興州  
刺史四年移漢州時蜀初平寇盜充斥晉卿嚴武備  
設方略禽捕剪滅靡有遺漏自是雖劇賊無敢窺其  
境然以賄聞太祖惜其才而不問秩滿歸闕以疾求  
願養改左監門衛將軍奉朝請貢重錦十匹銀千兩  
以謝詔不納以其黷貨愧之也未幾詔戍北邊疆場  
清肅開寶四年復授莫州刺史在郡謹斥候善撫循  
士卒皆樂為之用邊民安堵六年八月卒年六十七  
郭廷謂字信臣徐州彭城人父全義仕南唐為濠州  
觀察使廷謂幼好學工書善騎射補殿前承旨改濠

州中軍使李景每令偵中朝機事入奏全義卒擢莊  
宅使濠州監軍周世宗攻淮右南人屢敗城中甚恐  
廷謂與州將黃仁謙為固禦之計周師遣謀以鐵券  
及其壘廷謂拒之城內負販之輩率不逞廷謂慮其  
亡逸籍置大寺遣兵守之給日食俾製防城具隨其  
所習以故周師卒不得覘城中虛實周師為浮梁過  
口命張從恩焦繼勳守之廷謂語仁謙曰此濠壽之  
患也彼以騎士勝故利於陸我以舟師銳故便於水  
今夏久雨淮流汎溢願假舟兵二千斷其橋屠其城  
直抵壽春仁謙初沮其議不得已從之即輕擢銜枚

抵其橋麾兵斷笮悉焚之周師大斃死者不可計焚其資糧而還以功授武殿使周師退保定遠又募壯士為負販狀入定遠偵軍多寡及守將之名還曰武行德周務勅也廷謂曰是可圖也又籍鄉兵萬餘洎卒五千日夕訓練依山銜枚設伏以破之周師大潰行德單騎脫走時有以玉帛子女餉廷謂者悉拒之唯取良馬二百匹以獻以功為滁州刺史上淮巡檢應援兵馬都監及紫金山之戰南唐諸將多歸降者獨廷謂以全軍還守濠州追不能及時濠守欲棄城走廷謂止之俄加本州團練使繕戈甲治溝壘常若

敵至是秋周師復至表于景請援且言周兵四臨乞  
卑辭請和以固鄰好夜出敢死士千餘襲周營焚頭  
車洞屋周師蹂躪死者甚衆既而援兵不至周師急  
擊廷謂集諸軍壘門之外南望大慟而降于周至山  
陽見世宗特加宴勞賜金帶襲衣良馬器皿拜亳州  
防禦使以其弟本州馬步都校廷讚為和州刺史命  
攻天長軍降其將馬贇又為樓櫓戰權左右廂都監  
俄歸譙郡宋初從征上黨再知亳州乾德二年代還  
改絳州防禦使兩川平馮瓚知梓州為僕夫所訟召  
廷謂為靜江軍節度觀察留後以代之州承舊政有

莊宅戶車脚戶皆隸州將鷹鷄戶日獻雉兔田獵戶  
歲入皮革又有鄉將都將鎮將輩互擾閭里廷謂悉  
除之開寶五年卒年五十四廷謂性恭謹事母以孝  
聞未嘗不束帶立侍子延濬廷謂兄廷諭仕南唐為  
太子洗馬致仕宋初至秘書監廷諭子延澤

延濬字利川幼謙和初廷謂為靜江軍節度使延濬  
為桂州牙內都指揮使廷謂卒太祖錄延濬為供奉  
官屢使西北宣諭機事太平興國初以內廷宣索及  
殿前賜賚移文庫務未有專領之者乃置合同憑由  
應命延濬與內藏庫副使劉蒙正掌之又領八作司

及督治汴河雍熙三年改崇儀使詔與翟守素田仁  
朗王繼恩往河北分路按行諸州城壘發鎮兵葺之  
端拱二年詔建河北方田命延濬等五人共往規畫  
會罷其務而止淳化四年李順亂改西京作坊使充  
成都十州都巡檢使時成都將陷延濬單騎入城與  
郭載議募亡卒退保劔門賊數千來躡其後擊破之  
王繼恩率兵至以延濬為先鋒壕砦使即領兵倍道  
先進賊出探騎數十延濬悉禽之盡得賊機事延濬  
易旗變號賊不知覺斬關掩入斬千餘級繼恩又請  
延濬知漢州州經兵燹解舍橋梁城砦悉毀延濬募

軍民葺之又率州帑以應軍須錄功改洛苑使又命  
率兵屯遂州劔門鈐轄轉運使劉錫言其勞詔書嘉  
獎真宗初改內園使代還會河朔用兵延濬馳往邊  
城按視砦壘咸平二年疾卒子有倫為供奉官閤門  
祗候

延澤字德潤南唐試祕書省正字乾德中四遷著作  
佐郎轉殿中丞知建州淳化二年太宗聞延澤洎右  
贊善大夫董元亨皆好學博通典籍詔宰相召問經  
史大義皆條對稱旨命為史館檢討歷國子周易博  
士國子博士咸平中求休退授虞部員外郎致仕居

濠州城南有小園以自娛其誅牡丹千餘首聚圖籍萬餘卷手自刊校范杲韓丕皆與之游景德初卒元亨亦至虞部員外郎嘗續玄門碑誌三十卷

趙延進澶州頓丘人父暉周太子太師暉為偏將時趙在禮據鄴延進頗親學嘗與軍中少年入民家競取財賄延進獨持書數十編以歸同輩哂之漢末暉領鳳翔節度未赴鎮王景崇據城反命暉為都招討使擊之延進年十八屢當軍鋒景崇平延進奉捷奏以入授鳳翔牙內指揮使領貴州刺史暉徙宋州亦從為牙職改領滎州刺史睢陽有盜數百各立酋帥

為民患延進以父命領牙兵千餘悉禽戮之詔書褒  
美丁外艱表求持服既終喪周世宗征淮南延進獻  
萬縑以助軍仍請對世宗召見之時延進有從兄為  
虎捷都虞候帳前橫衝指揮使世宗指延進語之曰  
爾弟拳勇有謀將授以禁軍大校延進自陳好讀書  
不願也翌日授右千牛衛將軍濠州兵馬鈐轄從征  
瓦橋關為隨駕金吾街仗使宋初遷右羽林軍將軍  
濠州都監會伐蜀以襄州當川路津要命為鈐轄同  
知州務蜀平專領郡事漢江水歲壞隄害民田常興  
工修護延進累石為岸遂絕其患入為兩浙漳泉國

信使開寶二年授右龍武將軍知靈州以母老願留  
得權判右金吾街仗使歷知河中府梓相青三州太  
平興國中大軍平并州討幽薊皆為攻城八作壕砦  
使嘗詔督造礮具八百期以半月延進八日成太宗  
親試之大悅又令主城北諸洞子及班師命與孟玄  
喆藥可瓊留屯定州遼人擾邊命延進與崔翰李繼  
隆將兵八萬禦之賜陣圖分為八陣俾以從事師次  
蒲城遼騎空至延進乘高望之東西亘野不見其際  
翰等方按圖布陣陣去各百步士衆疑懼略無鬪志  
延進謂翰等曰主上委吾等以邊事蓋期於克敵爾

今敵衆若此而我師星布其勢懸絕彼若持我將何  
以濟不如合而擊之可以決勝違令而獲利不猶愈  
於辱國乎翰等曰萬一不捷則若之何延進曰儻有  
喪敗則延進獨當其責於是改為二陣前後相副士  
衆皆喜三戰大破之獲人馬牛羊鎧甲數十萬以功  
遷右監門衛大將軍知鎮州及代吏民數千守闕借  
留詔許留一年俄改右領軍衛大將軍出為高陽關  
平戎軍都監兼緣邊巡檢改鈐轄知揚州召入授右  
屯衛大將軍徙知相州遷右驍衛大將軍改知鄧州  
淳化初飛蝗不入境詔褒之還判右金吾街仗事至

四百个  
宋史文傳卷三十一  
徐福刊  
道二年拜右金吾衛大將軍咸平二年卒年七十三  
贈左武衛上將軍延進姿狀秀整涉獵經史好作詩  
什士流以此多之延進妻即淑德皇后之妹故在顯  
德興國中頗任以腹心子昂太平興國二年登進士  
第至戶部郎中直昭文館

輔超忻州秀容人家世業農超少勇悍有力晉開運  
中應募隸澶州軍籍漢乾祐中趙思綰據永興叛周  
祖護諸將討之督兵攻城超率驍勇十七人升雲梯  
斫北門樓樓壞而入士卒繼進城遂陷以功補小校  
顯德中從太祖征淮南常執銳前驅定滁泗破淮陰

下揚州以功轉日騎副兵馬使宋初從平上黨再遷  
內直都知太宗即位以超為馬軍都軍頭會親征太  
原冒矢石攀堞先登身被十三創帝嘉其勇賜錦袍  
銀帶帛五十段詰朝再乘城中流矢者八復加厚賜  
大舉襲范陽分兵三路超隸偏將米信為田重進先  
鋒取飛狐蔚州遷馬步軍副都軍頭俄出補曹州馬  
步軍都指揮使領峯州刺史改欒州召歸轉都軍頭  
淳化三年出為德州刺史坐誣奏使者毆殺驛吏責  
授右監門衛將軍領誠州刺史五年復加都軍頭領  
澄州刺史真宗即位加領獎州團練使真拜萊州團

練使以年老願留京師從之景德元年卒年七十七  
論曰太祖有天下凡五代之臣無不以恩信結之既  
以安其反側亦藉其威力以鎮撫四方故一時諸將  
吳虔裕蔡審廷之徒數從征討咸有勞績焉若馬令  
琮守河內儲兵食以迎王師解暉擊湖南冒鋒鏑以  
禽敵將此忠蓋驍果尤可稱者漢徽之疾危辭藥藏  
英之為親復讎亦皆一節之美惟張勳嗜殺晉卿冒  
貨雖立威著勤所不取也

列傳卷第三十

列傳卷第三十一

宋史二百七十二

開府儀同三司上柱國錄軍國事尚書丞相兼樞密使兼中書都總裁 脫等奉

勅修

楊業

子延昭等  
王貴附

荆罕儒從孫嗣

曹光實

從子克明

張暉

司超

楊業并州太原人父信為漢麟州刺史業幼倜儻任俠善騎射好畋獵所獲倍於人嘗謂其徒曰我他日為將用兵亦猶用鷹犬逐雉兔爾弱冠事劉崇為保衛指揮使以驍勇聞累遷至建雄軍節度使屢立戰

功所向克捷國人號為無敵太宗征太原素聞其名嘗購求之既而孤壘甚危業勸其主繼元降以保生聚繼元既降帝遣中使召見業大喜以為右領軍衛大將軍師還授鄭州刺史帝以業老於邊事復遷代州兼三交駐泊兵馬都部署帝密封橐裝賜予甚厚會契丹入鴈門業領麾下數千騎自西京而出由小陁至鴈門北口南嚮背擊之契丹大敗以功遷雲州觀察使仍判鄭州代州自是契丹望見業旌旗即引去主將戍邊者多忌之有潛上謗書斥言其短帝覽之皆不問封其奏以付業雍熙三年大兵北征以忠

武軍節度使潘美為雲應路行營都部署命業副之  
以西上閣門使蔚州刺史王侁軍器庫使順州團練  
使劉文裕護其軍諸軍連拔雲應寰朔四州師次桑  
乾河會曹彬之師不利諸路班師美等歸代州未幾  
詔遷四州之民於內地令美等以所部之兵護之時  
契丹國母蕭氏與其大臣耶律漢寧南北皮室及五  
押惕隱領衆十餘萬復陷寰州業謂美等曰今遼兵  
益盛不可與戰朝廷止令取數州之民但領兵出大  
石路先遣人密告雲朔州守將俟大軍離代州日令  
雲州之衆先出我師次應州契丹必來拒即令朔州

民出城直入石碣谷遣强弩千人列於谷口以騎士  
援於中路則三州之衆保萬全矣侂沮其議曰領數  
萬精兵而畏懦如此但趨鴈門北川中鼓行而往文  
裕亦贊成之業曰不可此必敗之勢也侂曰君侯素  
號無敵今見敵逗撓不戰得非有他志乎業曰業非  
避死蓋時有未利徒令殺傷士卒而功不立今君責  
業以不死當為諸公先將行泣謂羨曰此行必不利  
業太原降將分當死上不殺寵以連帥授之兵柄非  
縱敵不擊蓋伺其便將立尺寸功以報國恩今諸君  
責業以避敵業當先死於敵因指陳家谷口曰諸君

於此張步兵強弩為左右翼以援俟業轉戰至此即以步兵夾擊救之不然無遺類矣羨即與侁領麾下兵陣於谷口自寅至巳侁使人登托邏臺望之以為契丹敗走欲爭其功即領兵離谷口羨不能制乃緣交河西南行二十里俄聞業敗即麾兵却走業力戰自午至暮果至谷口望見無人即拊膺大慟再率帳下士力戰身被數十創士卒殆盡業猶手刃數十百人馬重傷不能進遂為契丹所擒其子延玉亦沒焉業因太息曰上遇我厚期討賊捍邊以報而反為姦臣所迫致王師敗績何面目求活耶乃不食三日死

帝聞之痛惜甚俄下詔曰執干戈而衛社稷聞鼓鼙而思將帥盡力死敵立節邁倫不有追崇曷彰義烈故雲州觀察使楊業誠堅金石氣激風雲挺隴上之雄才本山西之茂族自委戎乘式資戰功方提貔虎之師以効邊陲之用而群帥敗約援兵不前獨以孤軍陷於沙漠勁果焱厲有死不回求之古人何以加此是用特舉徽典以旌遺忠魂而有靈知我深意可贈太尉大同軍節度賜其家布帛千匹粟千石大將軍潘美降三官監軍王侁除名隸金州劉文裕除名隸登州業不知書忠烈武勇有智謀練習攻戰與士

卒同甘苦代北苦寒人多服氈罽業但挾纊露坐治  
軍事傍不設火侍者殆僵仆而業怡然無寒色為政  
簡易御下有恩故士卒樂為之用朔州之敗麾下尚  
百餘人業謂曰汝等各有父母妻子與我俱死無益  
也可走還報天子衆皆感泣不肯去淄州刺史王貴  
殺數十人矢盡遂死餘亦死無一生還者聞者皆流  
涕業既沒朝廷錄其子供奉官延朗為崇儀副使次  
子殿直延浦延訓並為供奉官延瓌延貴延彬並為  
殿直

延昭本名延朗後改焉幼沉默寡言為兒時多戲為

軍陣業嘗曰此兒類我每征行必以從太平興國中  
補供奉官業攻應朔延昭為其軍先鋒戰朔州城下  
流矢貫臂鬪益急以崇儀副使出知景州時江淮凶  
歎命為江淮南都巡檢使改崇儀使知定遠軍徙保  
州緣邊都巡檢使就加如京使咸平二年冬契丹擾  
邊延昭時在遂城城小無備契丹攻之甚急長圍數  
日契丹每督戰衆心危懼延昭悉集城中丁壯登陴  
賦器甲護守大會寒汲水灌城上旦悉為水堅滑不可  
上契丹遂潰去獲其鎧仗甚衆以功拜莫州刺史時  
真宗駐大名傳潛握重兵頓中山延昭與楊嗣石普

屢請益兵以戰潛不許及潛抵罪召延昭赴行在屢  
得對訪以邊要帝甚悅指示諸王曰延昭父業為前  
朝名將延昭治兵護塞有父風深可嘉也厚賜遣還  
是冬契丹南侵延昭伏銳兵於羊山西自北掩擊且  
戰且退及西山伏發契丹衆大敗獲其將函首以獻  
進本州團練使與保州楊嗣並命帝謂宰相曰嗣及  
延昭並出踈外以忠勇自效朝中忌嫉者衆朕力為  
保庇以及於此五年契丹侵保州延昭與嗣提兵援  
之未成列為契丹所襲軍士多喪失命李繼宣王汀  
代還將治其罪帝曰嗣輩素以勇聞將收其後效耶

宥之六年夏契丹復侵望都繼宣逗遛不進坐削秩  
復用延昭為都巡檢使時講防秋之策詔嗣及延昭  
條上利害又徙寧邊軍部署景德元年詔益延昭兵  
滿萬人如契丹騎入寇則屯靜安軍之東令莫州部  
署石普屯馬村西以護屯田斷黑盧口萬年橋敵騎  
奔衝之路仍會諸路兵犄角追襲令魏能張凝田敏  
竒兵牽制之時王超為都部署聽不隸屬延昭上言  
契丹頓澶淵去北境千里人馬俱乏雖衆易敗凡有  
剽掠率在馬上願飭諸軍扼其要路衆可殲焉即幽  
易數州可襲而取奏入不報乃率兵抵遼境破古城

俘馘甚衆及請和真宗選邊州守臣御筆錄以示宰  
相命延昭知保州兼緣邊都巡檢使二年追叙守禦  
之勞進本州防禦使俄徙高陽關副都部署在屯所  
九年延昭不達吏事軍中牒訴常遣小校周正治之  
頗為正所罔因緣為姦帝知之斥正還營而戒延昭  
焉大中祥符七年卒年五十七延昭智勇善戰所得  
奉賜悉犒軍未嘗問家事出入騎從如小校號令嚴  
明與士卒同甘苦遇敵必身先行陣克捷推功於下  
故人樂為用在邊防二十餘年契丹憚之目為楊六  
郎及卒帝嗟悼之遣中使護櫬以歸河朔之人多望

樞而泣錄其三子官其常從門客亦試藝甄叙之子

文廣

文廣字仲容以班行討賊張海有功授殿直范仲淹宣撫陝西與語奇之置麾下從狄青南征知德順軍為廣西鈐轄知宜邕二州累遷左藏庫使帶御器械治平中議宿衛將英宗曰文廣名將後且有功迺擢成州團練使龍神衛四廂都指揮使遷興州防禦使秦鳳副都總管韓琦使築篳篥城文廣聲言城噴珠率眾急趣篳篥比暮至其所部分已定遲明敵騎大至知不可犯而去遺書曰當白國主以數萬精騎逐

汝文廣遣將襲之斬獲甚衆或問其故文廣曰先人有奪人之氣此必爭之地彼若知而據之則未可圖也詔書褒諭賜襲衣帶馬知涇州鎮戎軍為定州路副都總管遷步軍都虞候遼人爭代州地界文廣獻陣圖并取幽燕策未報而卒贈同州觀察使

王貴者并州太原人廣順初補衛士宋初累遷至散員都指揮使馬步軍都軍頭領勝州刺史太平興國二年出為淄州刺史受詔從潘美北征攻沁州頗立戰功及從楊業為遼兵所圍親射殺數十人矢盡張空拳又擊殺數人遂遇害年七十三擢其子文晟供

字三百九十一  
李京

奉官文昱殿直

荆罕儒冀州信都人父基王屋令罕儒少無賴與趙鳳張輦為群盜晉天福中相率詣范陽委質燕王趙延壽得掌親兵開運末延壽從契丹主德光入汴署罕儒密州刺史漢初改山南東道行軍司馬周廣順初為率府率奉朝請貧不能振顯德初世宗戰高平戮不用命者因求驍勇士通事舍人李延傑以罕儒聞即召赴行在命為招收都指揮使會征太原命罕儒率步卒三千先入敵境罕儒令人負束芻徑趨太原城焚其東門擢為控鶴弩手大劔直都指揮使從

平淮南領光州刺史改秦州為下蔡守禦都指揮使  
兼舒蘄二州招安巡檢使四年秦州初下真拜刺史  
兼海陵鹽城兩監屯田使明年三月世宗幸秦州以  
罕儒為團練使賜金帶銀器鞍勒馬六年春軍吏者  
艾詣闕請留恭帝詔褒之建隆初升鄭州防禦以罕  
儒為使改晉州兵馬鈐轄罕儒恃勇輕敵嘗率騎深  
入晉境人多閉壁不出虜獲甚衆是年冬復領千餘  
騎抵汾州城下焚其草市案兵以退夕次京土原劉  
鈞遣大將郝貴超領萬餘衆襲罕儒黎明及之罕儒  
遣都監氈毯副使閻彥進分兵以禦貴超罕儒錦袍

衷甲據胡牀享士方割羊臂臠以啖聞彥進小却即  
上馬麾兵徑犯賊鋒并人攢戈舂之罕儒猶格鬪手  
殺十數人遂遇害劉鈞素畏罕儒之勇常欲生致及  
聞其死求殺罕儒者戮之太祖痛惜不已擢其子守  
勳為西京武德副使因索京土原之不效命者黜慈  
州團練使王繼勳為率府率閻彥進為殿直斬其部  
下龍捷指揮使石進德等二十九人罕儒輕財好施  
在秦州有煮海之利歲入鉅萬詔聽十收其八用猶  
不足家財入有籍出不問其數有供奉官張奉珪使  
秦州自言後唐張承業之子罕儒曰我生平聞張特

進名幸而識其子厚加禮待遺錢五十萬米千斛罕  
儒雖不知書好禮接儒士進士趙保雍登科覆落客  
游海陵罕儒問其所欲保雍以將歸京師且言緣江  
榷務以絲易茗有厚利罕儒立召主藏奴令籍藏中  
絲得四千餘兩盡以與之然好勇善戰不顧勝負常  
欲削平太原志未果而及於敗人皆惜之罕儒兄延

福延福孫嗣

嗣乾德初應募為控鶴卒從李繼勳討河東繼勳擇  
悍勇百人間道截落陽砦嗣出行間請行手斬五十  
餘級賊焚砦宵遁進薄汾河賊將楊業扼橋路嗣與

衆轉戰賊退踰橋殺業所部兵千計射中業從騎獲  
旗鼓鎧甲甚衆業退保城進焚南門奪羊馬城矢集  
于面賊數千夜來薄若繼勳選勇敢五百人接戰而  
嗣為冠及旦戰數合多所斬馘從太祖征太原賊來  
拒焚洞子遣殿前楊信領百人援之嗣預焉率先陷  
陣召見補御龍直太平興國初三遷至天武軍校太  
宗再征太原嗣自陳願率一隊先登命主城西洞子  
車駕巡師嗣登城手刃數賊足貫雙箭中手礮折二  
齒太宗見之亟召賜錦袍銀帶從征幽州隸殿前崔  
翰斬三十級補龍猛副指揮使五年契丹侵雒州據

龍灣堤嗣隸袁繼忠繼忠令率千兵力戰奪路內侍  
有至州闕城壘者出郭外敵進圍之亟出兵接戰十  
數合斬騎卒七百餘嗣軍夜相失在古城莊外三鼓  
突敵圍壁于莫州城下又領百人斧敵望櫓斬五十  
級敵為橋界河將遁嗣邀擊之殺獲甚衆六年從崔  
彥進捍契丹于靜戎北砦于唐興口彥進遣嗣率所  
部度河與契丹戰敗之追奔二十餘里八年李繼遷  
寇邊嗣從袁繼忠田欽祚戍三义口為前鋒斬賊千  
餘追之獲牛羊鎧甲弓矢數千計進至萬井口狐路  
谷餘賊復來請戰初以雄武千人為後殿為賊所掩

繼忠命嗣援之凡數戰始與雄武合隊因列陣格鬪  
復奪人馬七百餘欽祚夜還依山為營賊亦砮其下  
募勁卒五十往襲之嗣為其帥抵賊所刺殺百餘人  
焚其砮而還詔賜錦袍銀帶雍熙三年從田重進譚  
廷美率師入遼境疾戰飛狐口遼師不利重進引全  
師合擊遼騎引去進至飛狐城北遼將大鵬翼率眾  
復至重進陣壓東偏數戰不勝命嗣出西偏麾兵薄  
山崖以短兵接戰遼兵敗投崖而下手斬百餘級散  
卒千餘在野嗣呵止之悉斷弦折筈來降追至河槽  
復擊退餘眾屯土嶺裨將黃明與戰不勝將退嗣謂

之曰汝且頗兵於此為我聲援我當奪此嶺遂力戰  
追奔五十餘里抵倉頭而還又領招收卒千人克倉  
頭小治二砦黃明與戰克直谷砦命嗣屯焉數日遼  
人復致師重進與戰奔突往來大軍頗擾重進召嗣  
合戰悉走之奪礮具鎧冑賊乘夜復圍直谷石門二  
砦重進遣嗣以精兵五百濟之嗣曰敵二萬餘今援  
師甚寡難以解圍重進頗憂之嗣曰譚師屯小治縮  
兵二千願間道以往邀其策應中夜匹馬詣廷美廷  
美曰敵勢若此何可解也嗣曰請移全軍就平川植  
旗立隊別擇三二百人張白旗於道側彼見旗幟綿

亘遠甚謂大軍繼至嗣自以所部五百疾驅往鬪必克其砦廷美許焉一日凡五七戰遼兵遂引去咸如嗣所料蔚州之降也重進先命嗣率勇士數十人縋入見守將得其實狀翌日將受降而敵反拒大軍所出之路遂與鬪殺傷甚衆屢縋入城取守將之歸服者重進之壘糧運頗乏嗣遣降卒輦州廩濟之遼援兵大至副都指揮使江謙妄言惑衆嗣即斬之悉收兵斂輜重還重進砦與遼人轉戰時軍校五人其四悉鬪死至大嶺嗣與戰敗走之師還太宗引見便殿重進言其有勞補本軍都虞候又從李繼隆禦敵於

北平砦將赴蒲城道遇敵疾戰俘獲甚衆又戰于鸞  
女祠繼隆遣步卒二千伏定州古城為敵所攻命嗣  
援之至唐河橋嗣扼橋路出戰解敵圍數重與伏兵  
合分為三隊背水為陣敵將于越率騎百餘隊臨烽  
臺求戰嗣整兵與戰數合得與繼隆會又陣於東偏  
大敗之繼隆以聞詔嘉獎之遷本軍都指揮使領澄  
州刺史至道二年加御前忠佐馬步軍頭屯定州遼  
人入侵隸范廷召提偏師捍遼兵於嘉山廷召徙高  
陽命嗣以兵二千為殿過平敵城遼衆十餘萬來嗣  
屢出戰及桑贊秦翰來援夜二鼓敵再至嗣曰彼不

利夜戰我當破其砦以趣大軍即與贊翰合勢戒所部望敵炬火多處并力衝之詰旦至瀛州咸平三年加領本州團練使出為郎山路都巡檢使破敵砦於蒲陰俘獲甚衆四年命嗣領萬人斷西山路會敵遽至大兵不及進而止五年真拜蔡州團練使趙州部署踰年徙滄州是冬遼人入侵命率所部自齊州抵淄青警備景德初又命與劉漢凝田思明率兵至冀州防邊俄赴澶州行在所會遼人請和復遣還任歷鄆州鳳翔永興部署車駕幸亳州留為舊城內同都巡檢使大中祥符七年改號州防禦使邠寧環慶副

部署卒嗣起行間以勞居方面經百五十餘戰歿兄  
子信貴並為左侍禁貴至內殿崇班

曹光實雅州百丈人父疇為蜀靜南軍使控扼邛峽  
以捍蠻夷光實少武勇有膽氣輕財好施不事細行  
意豁如也疇卒光實嗣職遷永平軍節度管内捕盜  
遊奕使乾德中太祖命王全斌等平蜀俄而盜賊群  
起夷人張忠樂者嘗群行攻劫且憾光實殺其徒黨  
率眾數千中夜奄至環其居鼓譟並進光實負其母  
揮戈突圍以出賊眾辟易不敢近賊殺其族三百餘  
口又發冢墓壞其棺擲光實詣全斌具以事白誓雪

寃憤時蜀中諸郡未下乃圖雅州地形要害兼陳用  
兵攻取之策請官軍先下之全斌壯其志令率兵先  
導果克其城獲忠樂而甘心焉全斌乃署光實為義  
軍都指揮使殘寇猶據沈黎光實以所部盡平之遂  
以光實知黎雅二州兼都巡檢使安集勞來蠻族懷  
之六年秋全斌遣人貢京師遂言境內安乂乞罷義  
軍歸農太祖喜謂左右曰此蜀中傑俊也詔升殿勞  
問久之以為黎州刺史開寶三年改唐州刺史及平  
交廣群盜未息以光實為嶺南諸州都巡檢使既至  
捕逐群盜海隅以寧太平興國二年就遷本州團練

使車駕征河東以光實知威勝軍事令調軍食光實入告願提一旅奮銳先登帝曰資糧事重亦足宣力也河東平命為汾遼石沁等州都巡檢使五年改汝州團練使大軍北征與潘美分道出鴈門光實為前鋒遇敵迎擊敗之斬首數千級優詔嘉獎李繼捧之入朝也以光實為銀夏綏麟府豐宥州都巡檢使繼捧弟繼遷逃入蕃落為邊患光實乘間掩襲至地介澤俘斬甚衆破其族帳獲繼遷母妻及牛羊萬計繼遷僅免使人給光實曰我數奔北勢窘不能自存矣公許我降乎因致情款陳甥舅之禮期某日降於葭

蘆川光實信之且欲專其功不與人謀及期繼遷先  
設伏兵令十數人近城迎致光實光實從數百騎往  
赴之繼遷前導北行將至其地舉手麾鞭而伏兵應  
之光實遂遇害卒年五十五帝聞之驚悼賜賻加等  
以其子大理評事克讓為右贊善大夫克恭為殿直  
淳化二年又錄克己為奉職後至內殿承制克廣至  
閤門祗候從子克明

克明字堯卿既生會敵攻百丈縣父光遠遇害姆抱  
克明匿葦蒲中得免既長喜兵法善騎射從父光實  
竒之補為衙內都虞候光實擊敵于葭蘆川戰歿克

明時護輜重在後聞光實死懼軍亂秘不發喪陽令人西來傳光實命還軍銀州而潛與僕張貴入敵中獲光實尸以還葬京師繇是顯名初蜀人留京師者禁不得還鄉里克明以母老間道歸李順反聞克明將家子且有名欲脅以官克明携母遁山谷夜止神祠中夢有人叱之起既覺而去賊果至及賊陷雅州克明募衆數萬人以迎王師遂復名山火井夾門等九縣分兵嘉眉邛三州立七砦以邀賊復收雅州斬六十餘人賊將何承祿等走雲南蜀平擢西頭供奉官黎州兵馬監押以餘寇未息權邛州駐泊巡檢明

年峽路潰卒鄧紹等復起攻雅州克明又平之還軍  
邛州遇賊王珂戰于延貢鎮擊以矛中左踝後又設  
伏山下以數十騎與賊接戰克明僞北而所部失期  
伏不發克明挺身走賊追急乃倚大石引弓三發斃  
三人由是獲免入朝改內殿崇班為溫台等七州都  
巡檢使景德中蠻寇邕州改供備庫副使知邕州左  
右江蠻洞三十六克明召其酋長諭以恩信是歲承  
天節相率來集克明慰拊出衣服遺之感泣而去獨  
如洪峒恃險不至克明諭兩江防遏使黃衆盈引兵  
攻之斬其首領陸木前梟于市宜州澄海軍校陳進

反時鬱江暴漲州城摧圮克明率丁夫伐木為連舫  
維之水上狀如郭郭又多張旗幟浮巨楫陳兵其上  
為守禦備募溪峒兵三千而黃衆盈亦濟兵千五百  
將趣象州會巡撫使曹利用約克明會兵行次貴州  
遇賊大敗之斬首四百餘級賊平利用專其功代還  
真宗問南方事對稱旨賜一子官遷供備庫使江淮  
兩浙都大提舉捉賊克明使人捕賊輒出私錢資之  
以故人人盡力視賊中趨勇者釋縛使還捕其黨前  
後獲千餘人知江寧府張詠以其事聞賜錢四十萬  
領平州刺史知辰州撫水蠻叛徙宜融桂昭柳象邕

欽廉白十州都巡檢使兼安撫使既至蠻酋獻藥一器曰谿峒藥藥箭中人以是解之可不死克明曰何以驗之曰請試以鷄犬克明曰當試以人乃取藥箭刺首股而飲以藥即死群蠻慙懼而去是年冬安撫都監王文慶馬玉出天河砦東克明與中人楊守珍出環州樟嶺西磴道危絕林木深阻蠻多伏弩以待玉所向力戰屢敗蠻軍是時朝廷意在招附數詔諭克明而克明亦憚深入屢移文止玉玉至如門團為蠻所扼不得進克明遷延顧望月餘乃至撫水州與知州蒙承貴等約盟而還未幾知桂州兼管勾溪峒

公事始置溪峒司又奏閱廣南兩路土軍為忠敢軍  
州人覆茅為屋歲多火克明選北軍教以陶瓦又激  
江水入城以防火災代還知滁州徙鼎州會交趾李  
公蘊寇邕州以文思使復知邕州既至遣人人交趾  
諭以利害公蘊拜表謝罪遷西上閣門使歷知登舒  
邵三州復徙鼎州卒

張暉幽州大城人後唐清泰初隸控鶴軍累遷奉國  
弩手都頭晉開運末與武行德奪契丹甲船於河陰  
行德領河陽以暉為弩手指揮使復令引兵趣懷州  
契丹將遁去因領州軍漢祖入汴暉迎於滎陽授懷

州刺史乾祐初郢州刺史慕容業治多不法以暉為緣漢都巡檢使領唐州屯兵至郢州即代業還京改郢州刺史周廣順初劉崇寇晉絳召暉為步軍左廂排陣使師還改沂州刺史三年吏民詣闕舉留俄改冀州會詔築李晏口東鹿安平博野百八橋武強等城命暉護其役踰月而就從世宗征淮甸充壕砦都指揮使既拔楚泗即授泗州未幾改耀州俄為西南面橋道使宋初從征澤潞為行營壕砦使先登陷陣事平遷華州團練使在郡頗有治狀建隆二年太原未下詔入覲問計暉對曰澤潞經李筠之叛瘡痍未

復軍旅一興恐人力重困不若戢兵育民俟富庶而後為謀乃賜襲衣金帶鞍勒馬令還州朝廷方議伐蜀遷鳳州團練使兼緣邊巡檢壕砦橋道使暉盡得山川險易因密疏陳之太祖覽之大悅乾德二年大軍西下乃以暉充西川行營先鋒都指揮使督兵開大散關路躬撫士卒且役且戰人忘其勞十二月至青泥嶺卒天禧五年暉妻年百五歲家貧詣闕自陳詔賜束帛錄其孫永德為三班借職

司超大名元城人初事邢帥安叔千漢祖在太原超徃依之隸帳下為小校漢祖將渡河遣超先領勁騎

由晉絳趨河陽及入汴以超為鄆州必敵指揮使時  
京東諸州寇盜充斥以超為宋宿亳三州遊奕巡檢  
使改宿州西固鎮守禦都指揮使移屯潁州下蔡鎮  
屢與淮人戰有功周世宗命宰相李穀討淮南以超  
為步軍先鋒副都指揮使又為廬壽光黃等州巡檢  
使大敗淮人三千餘衆於盛唐縣獲權船四十餘艘  
禽其監軍高弼果毅指揮使許萬以獻時黃州未下  
即命超遙領刺史兼樓櫓戰權右廂都校師還改光  
州刺史敗吳軍千餘於麻城北顯德四年冬與王審  
琦攻舒州敗吳軍三千先禽刺史施仁望獻於行在

即以超為舒州團練使宋初命副宋偓領舟師巡撫江徼月餘特詔升舒州為防禦以超充使太祖討李重進以為前軍步軍都指揮使及平遣歸治所建隆三年春遷蔡州防禦使乾德六年改絳州防禦使徙晉州兵馬鈐轄是秋又副趙贊為邠州行營都部署進攻河東及太祖親征為行營前軍步軍都指揮使改鄭州防禦使開寶七年朝廷將討江左以超久在淮右習知江山險易徙蘄州防禦使行至淮西卒年七十一天禧元年錄其孫文睿為三班奉職

論曰昔許子卒於師葬之加等春秋書之所以褒臣

節而做官守也業罕儒光實咸當捍城之寄臨戎力  
戰歿于敵境雖罕儒恃勇不戒光實甘賊遷之言失  
在輕敵然其忘軀徇節誠可嘉也業本太原驍將感  
太宗寵遇思有以報常勝之家千慮一失然其素得  
士心部卒不忍離去從之以歿則忠義之風槩可見  
矣嗣與延昭並克紹勲伐延昭久居邊閫總戎訓士  
威名方略聞于敵人於嗣為優暉於危時則有陷陣  
之功平日則獻息戎之諫超頻戰以清淮海其忠誠  
勇果率有可尚者焉

列傳卷第三十一

第三十二

宋史二百七

高言上柱國錄事省中書丞相監脩國史領經筵事都總裁臣勝等奉

李進卿

子延渥

楊美

何繼筠

子承矩

李漢超

子守恩

郭進

牛思進附

李謙溥

子九正

姚内斌

董遵誨

賀惟忠

馬仁瑀

李進卿并州晉陽人少以驍勇隸護聖軍晉天福中杜重

威帥師敗安重榮於宗城進卿力戰有功擢為興順軍校

周祖開國命領所部兵戍靈壽久之遷龍捷指揮使顯德

初從世宗戰高平改鐵騎指揮使歷散員左射都校改鐵

騎及內殿直都虞候宋初領貴州刺史三遷鐵騎左廂都  
指揮使領乾州團練使乾德初遷控鶴左廂都指揮使改  
漢州團練使二年轉虎捷左廂都指揮使領澄州團練使  
是歲冬伐蜀以進卿爲歸州路行營步軍都指揮使拔巫  
山砦下夔萬二州蜀平錄功拜侍衛親軍步軍都虞候領  
保順軍節度開寶二年太祖親征河東留進卿爲在京都  
巡檢潁州刺史常暉淄州刺史韓光愿分爲河南北巡檢  
及還改親軍馬軍都虞候六年遷步軍都指揮使領靜江  
軍節度卒年五十九贈侍中子延渥延信延信至內殿崇

班

延渥以蔭補供奉官尋爲閤門祗候三遷至西京左藏庫使咸平初歷知平戎寧邊順安軍保州威虜軍鈐轄又知冀州六年徙瀛州景德初契丹大舉擾邊經胡盧河踰關南十月抵城下晝夜鼓譟四面夾攻旬日其勢益張唯擊鼓伐木之聲相聞驅奚人負板秉燭乘墉而上延渥率州兵強壯又集巡檢史普所部乘城發礮石巨木擊之皆累纍而墜殺傷甚衆翌日契丹主與其母親鼓衆急擊發矢如雨延渥分兵拒守益堅契丹遁去死者三萬餘傷者倍之獲鎧甲兵矢竿牌數百萬驛書以聞賜延渥錦袍金帶將士緡錢遷延渥本州團練使以通判太子中允陸元凱

爲國子博士賜緋推官李翔爲太子中允錄事參軍蔡亨  
爲右贊善善大夫侍禁兵馬監押王誨殿直員冀同巡檢史  
普爲內殿崇班充職如故初戍棚垂板護城纔數寸許契  
丹射之矢集其上凡二百餘及請葺城詔取板視之眞宗  
頗稱其勞又聞城守之際陸元凱流矢中面史普勇敢不  
避敵復遷元凱屯田員外郎普尚食副使普尋卒又錄其  
子昭度爲右侍禁昭儉爲奉職二年延渥徙知邢州歷天  
雄軍貝州副都部署知冀貝博三州大中祥符八年入朝  
以疾連賜告換右領軍衛大將軍領演州團練使明年從  
其請以左武衛大將軍致仕天禧初卒子宗禹爲內殿崇

班

楊美并州文水人本名光美避太宗舊名改焉美狀貌雄偉武力絕人以豪俠自任漢乾祐中周祖征三叛美杖策詣軍門求見周祖召與語壯之留帳下廣順初累遷禁軍大校從世宗征淮南以功擢鐵騎都指揮使領白州刺史太祖與美有舊即位以爲內殿直都知建隆三年升青州北海縣爲軍以美爲軍使爲政尚簡易民皆德之乾德二年召還北海民數百詣闕乞留詔諭之不去答爲首者始罷遷馬步軍都頭會討蜀以美爲歸州路戰權左右廂都指揮使蜀平遷內外馬步軍副都軍頭領恩州團練使開

寶二年改領端州防禦使六年加都軍頭領宣州觀察使  
俄授虎捷左右廂都指揮使領河西軍節度會遣党進潘  
美征太原命美爲行營馬軍都虞候太平興國二年冬出  
爲保靜軍節度三年夏以疾求解官歸京師尋醫藥詔遣  
內侍與道士馬志視之未幾卒年四十八贈侍中命中使  
護葬美爲人任氣好施凡得予賜及奉祿盡賜給親戚故  
舊死之日家無餘財人多歎息之

何繼筠字化龍河南人父福進歷事後唐至周累官忠武  
成德天平三節度繼筠幼時與群兒戲必分行伍爲戰陣  
之象晉初補殿直周祖討三叛表繼筠從行賊平改供奉

官廣順初福進鎮真定署衙內都校嘗領偏師出土門與  
并人戰斬首數千級以功領欽州刺史契丹將高模翰率  
二千騎擾深冀以葦棧度胡盧河繼筠與虎捷都指揮使  
劉誠誨率兵拒之至武強獲老稚千餘人模翰遁去俄隨  
福進入朝爲內殿直都知福進卒起復爲濮州刺史領兵  
戍靜安軍契丹內侵繼筠逆擊敗之改棣州刺史世宗征  
瓦橋關命繼筠以所部兵出百井道破并人數千衆恭帝  
即位以爲西北面行營都監建隆二年升棣州爲團練以  
繼筠充使三年命爲關南兵馬都監乾德四年加本州防  
禦使開寶元年秋命昭義節度李繼勳等征太原以繼筠

爲先鋒部署至渦河與并人遇擊走之奪汾河橋敗其衆於城下獲馬五百匹擒其將張環石贊以獻二年春太祖親征晉陽契丹來援繼筠時屯兵陽曲縣驛召至行在所授以方略命將精騎數千赴石嶺關拒契丹謂之曰翌日亭午俟卿來奏捷也至期帝御北臺以俟見一騎自北來亟遣逆問之乃繼筠子承睿來獻捷生擒刺史二人獲生口百餘斬首千餘級馬七百餘匹器甲甚衆初并人恃契丹爲聲援及捷奏太祖命以所獲首級鎧甲示城下并人喪氣繼筠以功拜建武軍節度判隸州三年來朝詔賜鞍馬戎仗令戍邊四年秋來朝疽發背車駕幸其第錫賚甚

厚未幾卒年五十一帝親臨之爲之流涕從容謂侍臣曰  
繼筠捍邊有功朕不早授方鎮者慮其數竒耳今纔領節  
制果至淪沒良可惜也贈侍中賻絹五百匹中使護喪令  
以生平所佩劔及介冑同葬繼筠深沉有智略前後備邊  
二十年與士卒同甘苦得其死力善揣邊情邊人畏伏多  
畫像祠之子承矩

承矩字正則幼爲棣州衙內指揮使從繼筠討劉崇擒其  
將胡澄以獻開寶四年授閑廐副使太平興國三年漳泉  
陳洪進納土詔承矩乘傳監泉州兵會仙遊莆田百丈寇  
賊嘯聚承矩與喬維岳王文寶討平之以功就遷閑廐使

疏爲政之害民者數十事上之悉被容納會改使名卽爲崇儀使五年知河南府時調丁男百十輩轉送上供綱承矩以爲橫役奏罷其事徙知潭州凡六年因圍屢空詔嘉獎之入爲六宅使端拱元年領潘州刺史命護河陽屯兵米信知滄州以其不習吏事命承矩知節度副使實專郡治時契丹撓邊承矩上疏曰臣幼侍先臣關南征行熟知北邊道路川源之勢若於順安砦西開易河蒲口導水東注于海東西三百餘里南北五七十里資其陂澤築隄貯水爲屯田可以遏敵騎之奔軼俟暮歲間關南諸泊悉壅闡卽播爲稻田其緣邊州軍臨塘水者止留城守軍士不

煩發兵廣戍收地利以實邊設險固以防塞春夏課農秋  
冬習武休息民力以助國經如此數年將見彼弱我強彼  
勞我逸此禦邊之要策也其順安軍以西抵西山百里許  
無水田處亦望選兵戍之簡其精銳去其冗繆夫兵不患  
寡患驕慢而不精將不患怯患偏見而無謀若兵精將賢  
則四境可以高枕而無憂太宗嘉納之屬霖雨爲災典者  
多議其非便承矩引援漢魏至唐屯田故事以折衆論務  
在必行乃以承矩爲制置河北緣邊屯田使俾董其役事  
具食貨志由是自順安以東瀕海廣袤數百里悉爲稻田  
而有莞蒲蜃蛤之饒民賴其利淳化四年擢爲西上閣門

使知滄州踰年徙雄州御書印紙錄其功最仍賜以弓劍承矩推誠御衆同其甘苦邊民有告機事者屏左右與之款接無所猜忌故契丹動息皆能前知至道元年契丹精騎數千夜襲城下伐鼓縱火以逼樓堞承矩整兵出拒遲明列陣酣戰久之斬馘甚衆擒其首所謂鐵林相公者契丹遁去是年春府州嘗敗契丹衆承矩條殺獲以諭州民或揭於市契丹愧忿故有是役太宗意其輕率致寇復命與滄州安守忠兩換其任魏廷式使河北得雄州功狀抗表上言又遣內侍劉勅覈實屢下士有功者千餘人皆進擢賚賜真宗嗣位復遣知雄州賜承矩詔曰朕嗣守鴻

業惟懷永圖思與華夷共臻富壽而契丹自太祖在位之日先帝繼統之初和好往來禮幣不絕其後尅復汾晉疆臣貪地爲國生事信好不通今者聖考上仙禮當計告汝任居邊要洞曉詩書凡有事機必能詳究輕重之際務在得中承矩貽書契丹諭以懷來之旨然未得其要咸平二年契丹南侵屢遣內侍以密詔問禦遏之計密封以獻嘗詔聽邊民越拒馬河塞北市馬承矩上言曰緣邊戰權司自淘河至泥姑海口屈曲九百餘里此天險也太宗置砦二十六鋪百二十五廷臣十一人戍卒三千餘部舟百艘往來巡警以屏姦詐則緩急之備大爲要害今聽公私貿

市則人馬交度深非便宜且砦鋪皆爲虛設矣疏奏即停  
前詔屢被手札褒飭三年召還拜引進使州民百餘詣闕  
貢馬乞借留承矩詔書嘉獎復遣之承矩上言曰契丹輕  
而不整貪而無親勝不相讓敗不相救以馳騁爲容儀以  
弋獵爲耕釣擲風沐雨不以爲勞露宿草行不以爲苦復  
恃騎戰之利故頻年犯塞臣聞兵有三陣日月風雲天陣  
也山陵水泉地陣也兵車士卒人陣也今用地陣而設險  
以水泉而作固建設陂塘綿亘滄海縱有敵騎安能折衝  
昨者契丹犯邊高陽一路東負海西抵順安士庶安居即  
屯田之利也今順安西至西山地雖數軍路纔百里縱有

丘陵岡阜亦多川瀆泉源因而廣之制為塘埭自可息邊  
患矣今緣邊守將多非其才不悅詩書不習禮樂不守疆  
界制御無方動誤國家雖提貔虎之師莫遏犬羊之衆臣  
按兵法凡用兵之道校之以計而索其情謂將孰有能天  
地孰得法令孰行兵衆孰強士卒孰練賞罰孰明此料敵  
制勝之道也知此而用戰者必勝否則必敗夫惟無慮而  
易敵者必擒於人也伏望慎擇疆吏出牧邊民厚之以奉  
祿使悅其心借之以威權使嚴其令然後深溝高壘秣馬  
厲兵為戰守之備修仁立德布政行惠廣安輯之道訓士  
卒闢田疇勸農耕畜芻粟以備凶年完長戟修勁弩謹烽

燧繕保戍以防外患來則禦之去則備之如此則邊城按堵矣臣又聞古之明王安集吏民順俗而教簡募良材以備不虞齊桓晉文皆募兵以服鄰敵故強國之君必料其民有膽勇者聚為一卒樂進戰効力以顯忠勇者聚為一卒能踰高赴遠輕足善鬪者聚為一卒此三者兵之練銳內出可以決圍外入可以屠城况小大異形強弱異勢險易異備卑身以事強小國之形也以蠻夷伐蠻夷中國之形也故陳湯統西域而郅支滅常惠用烏孫而邊鄙寧且聚膽勇樂戰輕足之徒古稱良策請試行之且邊鄙之人多負壯勇識外邦之情偽知山川之形勝望於邊郡置營

召募不須品度人才止求少壯有武藝者萬人俟契丹有  
警令智勇將統而用之必顯成功乃中國之長筭也又如  
榷場之設蓋先朝從權立制以惠契丹縱其渝信犯盟亦  
不之廢似全大體今緣邊榷場因其犯塞尋即停罷去歲  
以臣上言於雄州置場賣茶雖貨貨並行而邊氓未有所  
濟乞延訪大臣議其可否或文武中有抗執獨議是必別  
有良謀請委之邊任使施方略責以成功苟空陳浮議上  
惑聖聰祗如靈州足為證驗况茲契丹又非夏州之比也  
四年十月建議選銳兵於乾寧軍挽刀魚船自界河直趨  
平州境以牽西面之勢五年詔兼領制置屯田使始建榷

場或者謂承矩意在繼好然契丹無厭未足誠信徒使公  
行窺伺會契丹有殺斥候卒者復罷之時契丹數窺邊城  
大浚渠頗撓其役詔承矩握兵深入其境以分其勢承矩  
以無騎兵第遣數千卒出混泥城襲之而還景德元年入  
朝進領英州團練使真宗謂宰相曰承矩讀書好名以才  
能自許宜擇善地處之冬出知澶州承矩自守邊以來嘗  
欲朝廷懷柔遠人爲息兵之計及是車駕按巡本部卒與  
契丹和益加歎賞韓杞之至也命郊勞之明年春復知雄  
州是歲契丹始遣使奉幣承矩以朝廷待邊人之禮悠久  
可行者悉䟽以聞手詔嘉納仍聽事有未盡者便宜裁處

三年真拜雄州團練使時邊兵稍息農政未修又置緣邊安撫使命承矩爲之且詔邊民誘其復業承矩曰契丹聞之必謂誘其部屬也乃易詔文爲水旱流民之意王欽若時知樞密接漢蟲達周仲居改詔請罪承矩帝曰承矩任邊有功當優假之第詔自今朝旨未使者奏稟進止承矩頗有識鑒典長沙曰李沆王旦爲佐承矩厚待之以爲有公輔器善推步自知冥數乃以老疾求僻郡詔自擇其代承矩以李允則爲請乃授承矩齊州團練使遣之任至郡裁七日卒年六十一特贈相州觀察使賻錢五十萬絹五百匹中使護葬以其子龜齡爲侍禁昌齡九齡爲殿直遐

齡爲齋郎緣邊洎涿易州民聞承矩卒皆相率詣雄州發  
哀飯僧昌齡娶齊王女太和縣主至內殿崇班昌齡子象  
中爲閤門祗候

李漢超雲州雲中人始事鄴帥范延光不爲所知又事鄆  
帥高行周亦不見親信會周世宗鎮澶淵漢超遂委質焉  
即位補殿前指揮使三遷殿前都虞候宋初改散指揮都  
指揮使領綿州刺史累遷控鶴左廂都校領恩州團練使  
從平李重進尋遷齊州防禦使兼關南兵馬都監漢超在  
關南人有訟漢超強取其女爲妾及貸而不償者太祖召  
而問之曰汝女可適何人曰農家也又問漢超未至關南

契丹如何曰歲苦侵暴曰今復爾耶曰否太祖曰漢超朕之貴臣也為其妾不猶愈於農婦乎使漢超不守關南尚能保汝家之所有乎責而遣之密使諭漢超曰亟還其女并所貸朕姑貫汝勿復為也不足於用何不以告朕耶漢超感泣誓以死報在郡十七年政平訟理吏民愛之詣闕求立碑頌德太祖詔率更令徐鉉撰文賜之霸州監軍馬仁瑀嘗兄事漢超多自肆擅發麾下卒入遼境剽奪人口羊馬由是二將交惡太祖慮其生變遣中使賜漢超仁瑀金帛令和解之太平興國初遷應州觀察使判齊州仍為關南巡檢二年八月卒於屯所太宗甚悼惜贈太尉忠武

軍節度中使護葬漢超善撫士卒與之同甘苦死之日軍中皆流涕子守恩

守恩少驍果善戰有父風初補齊州牙職開寶二年太祖親征太原漢超爲北面行營都監守恩從父軍中會契丹遣兵援河東至定州西嘉山將入土門守恩領牙兵數千騎戰敗之斬首三千級獲戰馬器甲甚衆擒首領二十七人隨漢超見于行在賜戎服金帶器幣緡錢太祖謂左右曰此稚子能若是他日將帥才也漢超卒擢爲驍猛軍校累官至隴州刺史知靈州與轉運使陳緯部芻糧過瀚海爲賊所邀守恩及子廣文助教象之隴州衙內指揮使望

之弟寄班守忠皆沒真宗聞之震悼特贈守恩洪州觀察使次子祐之順之用之潤之慶之成之藏之

郭進深州博野人少貧賤爲鉅鹿富家傭保有膂力倜儻任氣結豪俠嗜酒蒲博其家少年患之欲圖殺進婦竺氏陰知其謀以告進遂走晉陽依漢祖漢祖壯其材留帳下晉開運末契丹擾邊漢祖建號太原契丹主道殂漢祖將入汴進請以奇兵間道先趨洛州因定河北諸郡累遷乾坊二州刺史少帝即位改磁州周廣順初移淄州二年吏民詣觀察使舉留是秋遷登州刺史會群盜攻劫居民進率鎮兵平之部內清肅民吏千餘人詣闕請立屏盜碑許

之顯德初移衛州衛趙邢洛間多亡命者以汲郡依山帶河易爲出沒伺間推剽吏捕之輒遁去故累歲不能絕其黨類進備知其情狀因設計發摘之數月間剪滅無餘郡民又請立碑記其事改洛州團練使有善政郡民復詣闕請立碑頌德詔左拾遺鄭起撰文賜之進嘗於城四面植柳壕中種荷芰蒲葦後益繁茂郡民見之有垂涕者曰此郭公所種也建隆初太祖親征澤潞遷本州防禦使充西山巡檢嘗與曹彬王全斌入太原境獲數千人開寶二年太祖親征河東以進爲行營前軍馬軍都指揮使九年命將征河東以進爲河東道忻代等州行營馬步軍都監招

徠山後諸州民三萬七千餘口太平興國初領雲州觀察使判邢州仍兼西山巡檢賜京城道德坊第一區四年車駕將征太原先命進分兵控石嶺關為都部署以防北邊契丹果犯關進大破之又攻破西龍門砦俘馘來獻自是并人喪氣時田欽祚護石嶺軍恣為姦利諸不法事進雖力不能禁亦屢形於言進武人性剛烈戰功高欽祚以他事侵之心不能甘自經死年五十八欽祚以暴卒聞太宗悼惜久之贈安國軍節度中使護葬後頗聞其事因罷欽祚內職出為房州團練使進有材幹輕財好施然性喜殺士卒小違令必寘於死居家御婢僕亦然進在西山太祖

遣戍卒必諭之曰汝輩謹奉法我猶貸汝郭進殺汝矣其御下嚴毅若此然能以權道任人嘗有軍校自西山詣闕誣進者太祖詰知其情狀謂左右曰彼有過畏罰故誣進求免爾遣使送與進令殺之會并人入寇進謂誣者曰汝敢論我信有膽氣今捨汝罪能掩殺并寇即薦汝於朝如敗可自投河東其人踴躍聽命果致克捷進即以聞乞遷其職太祖從之初開寶中太祖令有司造宅賜進悉用甬瓦有司言舊制非親王公主之第不可用帝怒曰進控扼西山十餘年使我無北顧憂我視進豈減兒女耶亟往督役無妄言太平興國初又賜宅一區

牛思進者祁州無極人少從軍以膂力聞嘗取強弓絃於耳以手引之令滿又負墻立力士二人撮其乳曳之疑不動軍中咸異之太平興國四年知平定軍從征河東石嶺關部署郭進卒命思進代之師還以功改本州團練使七年授右千牛衛上將軍致仕卒

李謙溥字德明并州孟人性慷慨重然諾父蕘後唐清泰中晉祖鎮并門署為參謀天福初為開封府推官使契丹還上言屈節外國非久長策時晉祖方父事契丹不悅其言出為汝州魯山令卒官謙溥少通左氏春秋從晉祖入汴補殿直奉使契丹少帝即位改西頭供奉官漢初遷東

頭周祖討三叛及守鄴都謙溥往來宣密命周祖愛之廣  
順初遷供備庫副使世宗征劉崇遼州刺史張乙堅壁不  
下遣謙溥單騎說之乙以城降以功改閑廐使師還留為  
晉州兵馬都監以偏師入河東境頻致克捷世宗詔褒美  
之會隰州刺史孫義卒時世宗親征淮南謙溥謂節帥楊  
廷璋曰大寧咽喉要地不可闕守且車駕出征若俟報則  
孤城陷矣廷璋即署謙溥權隰州事至郡亟命浚城隍嚴  
兵備凡八日并人果以數千騎來寇時盛暑謙溥單衣持  
扇從二小吏登城徐步按視戰具并人退舍後旬餘大發  
衝車攻城謙溥募敢死士得百餘人短兵堅甲銜枚夜緹

出城會廷璋兵至合勢夾攻掩其不及并人大擾悉衆遁去追北數十里斬首千餘級時顯德四年也明年五月攻破孝義縣以功領衢州刺史監軍如故世宗北征召赴行在恭帝即位爲澶州巡檢使詔城莫州數旬而就改丹州刺史建隆四年移慈州兼晉隰緣邊都巡檢行石州事以興同砦爲治所冬將有事于南郊太祖命四路進兵略地太原鄭州刺史孫延進絳州刺史沈繼深通事舍人王睿等師出陰地以謙溥爲先鋒會霍邑謙溥因畫攻取之策繼深等共沮之延進不能用軍還出白壁關次谷口謙溥語諸將曰王師深入敵境今旣退軍彼必乘我諸君當備

之諸將不答謙溥獨令所部擐甲俄追騎果至延進等倉  
皇走谷中獨謙溥麾兵拒之并人引退未幾移隰州刺史  
開寶元年命李繼勳等征太原以謙溥爲汾州路都監太  
祖征晉陽爲東砦都監前軍副部署党進遣謙溥伐木西  
山以給軍用未至聞鼓聲乃并人逼西砦大將趙贊禦之  
并衆未退謙溥麾所部赴之太祖遽至觀戰怪其赴援者  
非精甲問之乃謙溥也帝甚喜謙溥在州十年敵人不敢  
犯境有招收將劉進者勇力絕人謙溥撫之厚藉其死力  
往來境上以少擊衆并人患之爲蠟丸書以間進佯遺書  
道中晉帥趙贊得之以聞太祖令械進送闕下謙溥詰其

事進伏請死謙溥曰我以舉宗四十口保汝矣即上言進  
爲并人所惡此乃反間也奏至帝悟遽令釋之賜以禁軍  
都校戎帳服具進感激願擊敵自効開寶三年召謙溥爲  
濟州團練使後邊將失律復爲晉隰緣邊巡檢使邊民聞  
之喜爭相迎勞於道左六年領兵入太原連拔七砦八年  
以疾求歸肩輿抵洛太祖遣中使領太醫就視之至京師  
疾篤累上章辭祿不許明年春卒年六十二太祖甚痛惜  
之賻贈有加葬事官給謙溥與宣祖同里閭弟謙昇與太  
祖爲布衣交其母閻嘗厚待太祖及即位數迎入宮中使  
左右掖之不令拜命坐飲食話及舊故賜賚優厚雍熙中

太宗為許王納謙昇女為夫人以謙昇為如京副使謙溥  
 子允則允正允則至寧州防禦使從子允恭為內殿崇班  
 閣門祗候

允正字修己以蔭補供奉官太平興國中掌左藏庫屢得  
 升殿奏事太宗頗記憶其舊故雍熙中與張平同掌三班  
 俄為閣門祗候四年遷閣門通事舍人時女弟適許王以  
 居第質于宋偃太宗詰之曰爾父守邊二十餘年止有此  
 第耳何以質之允正具以奏即遣內侍輦錢贖還搢紳咸  
 賦詩頌美淳化中命討戎瀘州叛蠻遷西上閣門副使太  
 宗慮京城獄囚淹繫命允則提總之嘗請詔御史臺給開

封府司錄司左右軍巡四排岸司印紙作囚簿署禁繫月  
日條其罪犯歲滿較其殿最詔從其請踰年開封府上言  
京師浩穰禁繫尤衆御史府考較之際胥吏奔命有妨推  
鞫况無欺隱不煩推校卒罷之允正又提點左右藏屢乘  
傳北面經度邊要五年為衛州修河部署會建清遠軍積  
石砦命詣瀚海部分其役還拜西上閣門使并州駐泊鈐  
轄俄代張承德知州事徙代州咸平初使西蜀詢訪民事  
還進秩東上閣門使歷知鎮莫二州又為并代馬步軍鈐  
轄契丹擾邊車駕駐大名允正與高瓊率太原軍出土門  
路來會召見便殿所部有廣銳騎士數百皆素練習命允

正引以入賜緡錢遣屯邢州與石保吉逐遼人遼人遁去  
俄以兵會大名復還并代五年合涇原儀渭邠寧環慶兩  
路為一界命王漢忠為都部署驛召允正為鈐轄兼安撫  
都監即日上道又命與錢若水同詣洪德懷安沿邊諸砦  
經度邊事加領誠州刺史七月罷兩路之職復任并代鈐  
轄每錢若水按巡邊壘即詔權涖州事進四方館使代馬  
知節為鄜延部署兼知延州改客省使知定州兼鎮定都  
鈐轄大中祥符三年累表求還至京師將祀汾陰以疾難  
於扈從命為河陽部署以便養會張崇貴卒趙德明頗踰  
軼亟詔徙允正為鄜延部署內侍密詔存諭禮成領河州

團練使允正頗知書性嚴毅踈財喜自修飭素病痾痿以是罕在要近累典邊任多殺戮是秋徙知永興軍卒年五

十一

姚弼平州盧龍人仕契丹爲關西巡檢尾橋關內弼率衆五百人德六年太祖從世宗北征兵次尾橋關內弼率衆五百人以城降世宗以爲汝州刺史吏民詣闕舉留恭帝詔褒之內弼本名犯宣祖諱下一字遂改今名從平李筠改號州刺史西夏數犯西鄙以內弼爲慶州刺史兼青白兩池權鹽制置使在郡十數年西夏畏伏不敢犯塞號內弼爲姚大蟲言其武猛也初內弼降其妻子皆在契丹乾德四年

子承贊密自幽州來歸五年幽州民田光嗣等又以內斌  
兒女六人間道來歸太祖並召見賜以衣服緡錢鞍馬令  
中使護送還內斌開寶四年召赴闕上待之甚厚遣歸治  
所七年春暴得疾卒年六十四遣中使護喪歸葬洛陽常  
賻外賜其子田三十頃承贊爲供奉官閤門祗候死于陣  
承鑒至殿中丞

董遵誨涿州范陽人父宗本善騎射隸契丹帥趙延壽麾  
下嘗以事說延壽不能用及延壽被執舉族南奔漢祖得  
之擢拜隨州刺史署遵誨隨州牙校周顯德初世宗北征  
大將高懷德遵誨之舅也表遵誨從行師次高平與晉人

遇將接戰晉兵未成列懷德命遵誨先出奇兵擊之晉人潰大軍繼進遂敗之二年討秦鳳大將韓通又表遵誨自隨與賊戰于唐倉先登陷陣擒蜀招討使王鸞以獻克秦鳳二州師還錄其前後功補東西班押班又遷驍武指揮使四年從世宗征淮南攻合肥下之六年從韓通平雄霸二州太祖微時客遊至漢東依宗本而遵誨憑藉父勢太祖每避之道誨嘗謂太祖曰每見城上紫雲如蓋又夢登高臺遇黑蛇約長百尺餘俄化龍飛騰東北去雷電隨之是何祥也太祖皆不對他日論兵戰事遵誨理多屈拂衣而起太祖廼辭宗本去自是紫雲漸散及即位一日便殿

召見遵誨伏地請死帝令左右扶起因諭之曰卿尚記往日紫雲及龍化之夢乎遵誨再拜呼萬歲俄而部下有軍卒擊登聞鼓訴其不法十餘事太祖釋不問遵誨益惶愧待罪太祖召而諭之曰朕方赦過賞功豈念舊惡耶汝可勿復憂吾將錄用汝遵誨再拜感泣又問遵誨母安在遵誨奏曰母氏在幽州經患難睽隔太祖因令人賂邊民竊迎其母送與遵誨遵誨遣外弟劉綜貢馬以謝太祖解其所服真珠盤龍衣命齎賜之綜曰遵誨人臣豈敢當此太祖曰吾方委以方面不此嫌也會李筠叛澤潞令遵誨從慕容延釗討之遷馬軍都軍頭因留之鎮守三年召歸再

遷爲散騎都虞候乾德六年以西夏近邊授通遠軍使遵  
誨旣至召諸族酋長諭以朝廷威德割羊醢酒宴犒甚至  
衆皆悅服後數月復來擾邊遵誨率兵深入其境擊走之  
俘斬甚衆獲羊馬數萬夷落以定太祖嘉其功就拜羅州  
刺史使如故太宗即位兼領靈州路巡檢遵誨不知書豁  
達無崖岸多方略能挽強命中武藝皆絕人在通遠軍凡  
十四年安撫一面夏人悅服嘗有剽略靈武進奉使鞍馬  
兵器者遵誨部署帳下欲討之夏人懼盡歸所略拜伏請  
罪遵誨卽慰撫令去自是各謹封略秋毫不敢犯歷太祖  
太宗朝委遇始終不替許以便宜制軍事太平興國六年

卒年五十六帝軫悼久之遣中使護葬賙賻加等錄其子  
嗣宗嗣榮為殿直

賀惟忠忻州定襄人少勇敢善騎射周祖將兵討三叛惟  
忠謁於道左自陳其有武藝周祖悅之即留置所部洎開  
國得隸世宗帳下奏補供奉官不辭輒入朝世宗怒之及  
嗣位終不遷擢初授儀鸞副使令知易州捍邊有功尋遷  
正使開寶二年太祖駐常山以惟忠為本州刺史兼易定  
祁等州都巡檢使嘗中流矢六年金瘡發而卒太祖聞之  
嗟悼即以其子昭度為供奉官惟忠性剛果知書洞曉兵  
法有方略在易州繕完亭障撫士卒得其死力每乘塞用

兵所向必克威名震北邊故十餘年間契丹不敢南牧昭  
度至西京作坊使淳化中知通遠軍有罪當棄市減死流  
商州

馬仁瑀大名夏津人十餘歲時其父令就學輒逃歸又遣  
於鄉校習孝經旬餘不識一字博士笞之仁瑀夜中獨往  
焚學堂博士僅以身免常集里中群兒數十人與之戲爲  
行陣之狀自稱將軍日與之約鞭其後期者群兒皆畏伏  
又市果均給之益相親附及長善射挽弓二百斤漢乾祐  
中周祖鎮鄴仁瑀年十六願隸帳下周祖素聞其勇旣見  
甚喜留置左右廣順初補內殿直世宗嗣位命衛士習射

苑中仁瑀弓力最勁而所發多中賜錦袍銀帶會太原劉崇入寇世宗親征至高平周師不利諸將多引退仁瑀謂衆曰主辱臣死安用我輩乃控弦躍馬挺身出陣射賊斃者數十人士氣益振大軍乘之崇遂敗績世宗至上黨諸將坐失律誅者七十餘人擢仁瑀爲弓箭控鶴直指揮使及還京又遷散指揮使從征淮南至楚州攻水砦砦中建飛樓高百尺餘世宗觀之相去殆二百步樓上望卒厲聲嫚罵世宗怒甚命左右射之遠莫能及仁瑀引滿應弦而顛及淮南平身被數十創賜以良藥遷內殿直都虞候又從平三關恭帝嗣位詔從太祖北伐初以佐命功授散員

都指揮使領貴州刺史俄遷鐵騎右廂都指揮使又爲虎捷左廂都指揮使領扶州團練使從平澤潞以功領常州防禦使改龍捷左廂都指揮使建隆二年改領岳州防禦使俄又移領漢州初詔仁瑀等領荆湖諸郡不數歲復其地至是將征蜀又詔領川峽諸郡遂平之先是薛居正知貢舉仁瑀私囑所與者榜出無其人聞喜宴曰仁瑀酒酣攜所囑者詣居正切責之爲御史中丞劉溫叟所劾帝優容之王繼勳以后族驕恣凌蔑將帥人皆引避獨仁瑀詞氣不相下嘗攘臂欲歐之會帝將講武郊外遂欲相圖各勒所部兵私市白梃太祖密知之詔罷講武出仁瑀爲密

州防禦使太祖征晉陽命仁瑀率師巡邊至上谷漁陽契丹素聞仁瑀名不敢出因縱兵大掠俘生口牛羊數萬計駕還仁瑀歸治所明年群盜起兗州賊首周弼毛襲甚勇悍材貌奇偉弼號曰長脚龍監軍討捕數不利詔仁瑀掩擊仁瑀率帳下十餘卒入泰山擒弼盡獲其黨魯郊遂寧開寶四年遷瀛州防禦使兄子嘗因醉誤殺平民繫獄當死民家自言非有宿憾但過誤爾願以過失殺傷論仁瑀曰我爲長吏而兄子殺人此怙勢爾非過失也豈敢以私親而亂國法哉遂論如律給民家布帛爲棺斂具太平興國初移知遼州四年車駕征太原命仁瑀與成州刺史慕

容超飛龍使白重貴八作使李繼昇分兵攻城及征范陽  
命仁瑀率禁兵擊契丹於盧龍北契丹兵奔潰師還遷朔  
州觀察使判瀛州事七年卒年五十贈河西軍節度葬事  
官給

論曰宋初交廣劔南太原各稱大號荆湖江表止通貢奉  
契丹相抗西夏未服太祖常注意於謀帥命李漢超屯關  
西馬仁瑀守瀛州韓令坤鎮常州賀惟忠守易州何繼勳  
領棣州以拒北敵又以郭進控西山武守琪戍晉州李謙  
溥守隰州李繼勳鎮昭義以禦太原趙贊屯延州姚內斌  
守慶州董遵誨屯環州王彥昇守原州馮繼業鎮靈武以

備西夏其族在京師者撫之甚厚郡中筦權之利悉以與之恣其貿易免其所過征稅許其召募亡命以爲爪牙凡軍中事皆得便宜每來朝必召對命坐厚爲飲食錫賚以遣之由是邊臣富貲能養死士使爲間諜洞知敵情及其入侵設伏掩擊多致克捷二十年間無西北之憂以至命將出師平西蜀拓湖湘下嶺表克江南所向遂志蓋能推赤心以馭群下之所致也若李進卿楊美亦專師西征而美居北海以樂易結民心誠得爲政之本延渥承矩守恩允正皆紹先業以勲名著承矩議屯田贊和好其謀甚遠守恩以果敢死事宋之武功於斯爲盛焉

列傳卷第三十二